

四庫全書

集部

欽定四庫全書

集部

杜詩詳註卷二

詳校官給事中_臣王鍾健

檢討_臣何思鈞覆勘

總校官進士_臣朱鈐

校對官待詔_臣胡士震

謄錄監生_臣王志遠

欽定四庫全書

杜詩詳註卷二

翰林院編修仇兆鰲撰

飲中八仙歌

黃鶴注蔡興宗年譜云天寶五載而梁權道編在天寶十三載按史汝陽

王天寶九載已薨賀知章天寶三載李適之天寶五載蘇晉開元二十二年並已歿此詩當是天寶間追憶舊事而賦之未詳何年
傳正李白新墓碑在長安時時人以公及賀監汝陽王崔宗之裴周南等八人為酒中八仙公此篇無裴宣范別有稽耶

知章騎馬似乘船
眼花落井水底眠

此極摹賀公狂態騎馬若船言醉中

自得眼花落井言醉後忘軀吳人善乘舟故以比乘馬舊唐書賀知章會稽永興人自號四明狂客又稱

秘書外監醉後屬辭動成卷軸文不加點咸有可觀天寶三載上疏請度為道士還鄉里越絕書夫越水行

而山處以船為車以楫為馬吳均雜句夢中難言見終成亂眼花張華詩三雅來何遲耳熱眼中花抱朴

子余從祖仙公每大醉輒入深淵之底一日許乃出此條偽蘇注所引阮咸王祥事俱係妄撰今削去汝

陽三斗始朝

音潮

天道逢

一作見

麴車口流涎恨不移封向

酒泉

三斗朝天醉後入朝也見麴流涎欲向酒泉甚言汝陽之好酒舊書讓皇帝長子璿封汝陽郡王

與賀知章褚庭誨為詩酒之交抱朴子管輅傾酒三斗而清辯綺聚漢樂府婦病行道逢親交魏文帝

與吳質書蒲萄釀以為酒甘於麴蘖道之已流涎咽唾漢同涎陸機詩日苦濁鏡日流涎三秦記酒泉郡城

下有金泉泉味如酒故名酒泉拾遺記羌人姚馥嗜酒
羣輩呼為渴羌晉武帝擢為朝歌宰辭曰請辭朝歌之
縣長充養馬之役時賜美酒以樂餘年帝曰朝歌紂之
舊都地有酒池使老羌不復呼渴對曰老羌漸染王化
若歡酒池之役更為殷紂之民帝大悅即遷酒泉太守
此條偽蘇注所引北齊王詢及漢郭弘事亦係妄撰
師氏又造為舊史拾遺之說並無根據

左相去日興費萬錢飲如長鯨吸

百川銜杯樂

音洛

聖稱避

舊本作世邵氏聞見錄作避

賢

費萬錢言其豪侈吸百川

狀其縱飲樂聖避賢即述適之詩中語
雅好賓友飲酒一斗不亂夜則燕賞晝決公務天寶元
年代牛仙客為左丞相與李林甫爭權不叶五載罷知
政事守太子少保與親知歡會賦詩曰避賢初罷相樂
聖且啣杯為問門前客今朝幾個來七月貶宜春太守
仰藥而卒黃希曰日費萬錢餉客之用皆出於此是

也師氏謂唐時酒價每斗三百錢以萬錢計之當飲三石三斗有餘誤矣據本傳但云一斗不亂耳晉書何曾曰食萬錢猶言無下箸處左思吳都賦長鯨吞航修鯢吐浪木華海賦魚則橫海之鯨突兀孤游翕波則洪連踧踖吹濤則百川倒流劉伶酒德頌銜杯漱醪魏志醉客謂酒清者為聖人濁者為賢人世說簡

文曰請避賢路

宗之蕭灑美少

去聲

年舉觴白眼望青天皎如玉

樹臨風前

宗之蕭灑丰姿超逸白眼望天席前傲岸之狀玉樹臨風醉後搖曳之態舊書崔宗之

日用之子襲封齊國公李白傳侍御史崔宗之謫官金陵與白詩酒倡和北山移文蕭灑出塵之想阮籍

詩朝為美少年列子景公舉觴自罰晉書阮籍任情不羈見禮俗之士以白眼對之列子至人者上闕

青天甘泉賦翠玉樹之青葱世說毛蘇晉長齋繡佛曾與夏侯玄共坐時人謂蒹葭倚玉樹

前醉中往往愛逃禪

持齋而仍好飲晉非真禪直逃禪耳 逃禪猶云逃墨逃楊是逃而

出非逃而入杜臆云醉酒而悖其教故曰逃禪後人以學佛者為逃禪誤矣 新唐書蘇晉珣之子數歲知為文房頴叔王紹宗數曰後來之王粲也舉進士先天中為中書舍人玄宗監國所下制命多晉及賈曾稟定屢獻諫言天子嘉允厯戶吏二部侍郎終太子庶子 續晉陽秋謝敷崇信釋氏以長齋供養為業徐陵雙林寺碑絕粒長齋 唐弘明集宋劉義隆時靈鷲寺有羣燕共銜繡像委之堂內據此則繡佛之製久矣 此條師氏謂晉得胡僧所繡 彌勒佛事亦屬偽撰

李白一斗詩百篇長安市上酒家

眠天子呼來不上

上聲

船自稱臣是酒中仙

斗酒百篇言白之興豪而

才敏 吳論當時沉香亭之召正眠酒家白蓮池之召扶以登舟此兩述其事酒中仙兼述其語 新唐書李

白興聖皇帝九世孫天寶初至長安往見賀知章知章見其文曰子謫仙人也言於玄宗召見金鑾殿奏頌一篇帝賜食親為調羹有詔供奉翰林白猶與飲徒醉於市帝坐沉香亭子欲得白為樂章召入而白已醉左右以水頰面稍解援筆成文婉麗精切帝愛其才數宴見范傳正李白新墓碑玄宗泛白蓮池公不在宴皇惟既洽召公作序時公已被酒翰林中命高將軍扶以登舟史記淳于髡傳臣飲一斗亦醉墨子周公朝讀百篇晉書劉延之為始安郡與淵明二萬錢悉送酒家王濬表先臣一日上其船王績醉鄉記中國以仙為酒

張旭三杯草聖傳脫帽露頂王公前揮毫落紙如

雲煙

旭書為人傳頌故以草聖比之脫帽露頂醉時豪放之狀落紙雲煙得意疾書之興舊書吳郡張

旭善草書好酒每醉後號呼狂走索筆揮灑變化無窮若有神助國史補旭飲酒輒草書揮筆而大叫以頭搥

水墨中而書之。雁後自視，以為神異。金壺記：旭官右率府長史。漢書：朱博案上不過三杯。王愔：文章志後。

漢張芝好草書，學崔杜之法。韋仲將謂之草聖。古樂府：少年見羅敷，脫帽着情頭。後漢西域傳：莫不露頂。

肘行李頎贈旭詩：露頂據胡牀，長叫三五聲。高允微士頌：揮毫頌德。宗欽贈高允詩：彈毫珠零落，紙錦聚。

潘岳楊荊州詩：翰動若飛，落紙如雲。高彪詩：抗志凌雲烟。焦遂五斗方卓然，高談。

雄辯驚四筵。沈論：驚筵得於醉後，見遂之卓然，特異。非。

齊但首尾中腰，各用兩句前後，或三或四，間錯成文，極變化而仍有條理。東郊甘澤謠：陶峴開元中，家於崑。

山自製三舟，客有前進士孟彥深，進士孟雲卿布衣焦遂，各置僕妾共載遊山水。滑稽傳：淳于棼曰：朋友交。

遊私情，相語飲，不過五六斗，竟醉矣。漢元帝紀：卓然可觀。庾信詩：高譚變白馬，雄辯塞飛狐。謝瞻詩：四。

筵需芳醴 此條師氏所
引口吃之說亦屬妄撰

蔡條寬夫詩話此歌眠字天字再押前字三押古未
見其體叔父元度云歌分八篇人人各異雖重押韻
無害亦周詩分章之意也 唐汝詢曰柏梁詩人各
說一句八仙歌人各記一章特變其體耳重韻何害

學 王嗣爽杜臆曰此條創格前古無所因後人不能
學描寫八公各極生平醉趣而都帶仙氣或兩句或
三句四句如雲在晴空卷舒自如亦詩中之仙也
吳見思曰此詩一人一段或短或長似銘似贊合之
共為一篇分之各
成一章誠創格也

舊刻分類千家注多載偽蘇注大概以杜句為主添
設首尾假託古人初無其事蔡傳卿編年千家本削
去最快前輩如邵二泉焦弱侯多為偽註所惑後來
五車韻瑞遂引作實事張邇可會粹又本韻瑞且於

附會古人處妄添某史可謂巧于緣飾矣近日吳門所刻庾開府文集亦誤引偽注沿訛不覺亟當正之此篇所引偽蘇注數條緊從芟却不使惑人

高都護驄馬行

按高仙芝平少勃律在天寶六載是年大食諸部七十二國皆降附

八載入朝詩云飄飄遠自流沙至又云長安健兒不敢騎正其時七九載仙芝討石國俘其王以獻則知次年又往邊疆矣此詩當是天寶八載所作黃云七載梁云十一載皆非漢書鄭吉傳吉威震西域遂并護車師以西北道故號都護都護之置自吉始焉注並護南北二道故謂之都

安西都護青驄聲價歟

許勿切

然來向東此馬臨陣以

無敵與人一心成大功

此言驄馬在邊而有功行陣舊唐書貞觀十七年置安西都

護府於西州顯慶三年移治龜茲國城于闐以西波斯
以東十六都護府隸焉隋書西域吐谷梁有青海中

有小山至冬冰合嘗得波斯馬放入海因生驄馬日行
千里故時稱青海驄馬胡青驄猶淮南子所云胡駿

馬古詩躑躅青驄馬廣韻驄馬青白色
價隆振又歛聳擢以驚注歛忽也漢天馬歌天馬來

立無草徑千里循東道戴嵩詩刀環臨陣鳴史記項
王謂亭長曰吾騎此馬五歲所向無敵國語戮力一

心大戴禮均馬力齊馬心應德璉慙驥賦展心力於知
已兮史記廉頗曰我為趙將有攻城野戰之大功

功成惠養隨所致飄飄一作遠自流沙至雄姿未受伏

櫪恩猛氣猶思戰場利此言驄馬在廐而不忘戰伐
諸白馬賦願終惠養蔭本枝兮

縣曹植詩飄飄隨長風元和郡縣志居延澤在張掖
東北一千六百里即古流沙天馬歌天馬來從西極

涉流沙赭白馬賦弭雄姿以奉引漢書李尋傳馬

不伏櫪不可以趨道注伏櫪謂伏槽櫪而秣之西征賦何猛氣之咆勃戰國策

張儀曰魏之地勢固戰塲也腕一作促蹄高如踣音鐵

交河幾蹴曾冰裂五花散作雲滿身萬里方看汗

流血此言其形相精力之出羣上云流沙此云交河正見來自遠地也南都賦馬踣餘足相馬經馬

腕欲促促則健蹄欲高高耐險峻齊民要術馬腕欲促而大其間纔容鞞蹄欲得厚二三寸硬如石踣踏也

邵注踣鐵言馬蹄之堅元和郡縣志貞觀四年於漢車師前王地置交河縣取界內交河為名交河源出縣

北天山分流城下一統志今為西番火州地王洙注唐安西去交河七十里顧野王詩交河冰未堅趙曰東

方朔神異記曰北方有層冰萬里厚百丈詩言交河有層積之水馬幾度蹴踏之而破裂也舊引顧賦經玄蹄

而電散歷素皮而冰裂非是蓋賦謂騎射耳玄蹄素皮
皆射帖名而電散冰裂皆射帖聲與馬踏冰裂之義無
涉名畫錄開元內廐有飛黃照夜浮雲五花之乘
丹元子步天歌五箇花文王良星李白集注五花馬毛
色也又郭若虛云五花者剪鬃為辮或三花或五花白樂
天詩馬鬣剪三花此另一說天馬歌經萬里分歸有
德漢書李廣利獲汗血馬來注大宛舊有天馬種踴
石汗血汗從前肩膊小孔中出如血趙曰汗血之姿非
萬里無以見

長安壯兒不敢騎走過掣電傾城知青絲絡頭

為

去聲

君老何由却出橫

孟康音先

門道

末用感慨作結即老

驥伏櫪志在千里之

意

此章四段各四句

鄭氏曰

長安古雍州地漢始

都此

崔豹古今注秦始皇有七馬一曰追電隋書長

孫晟為總管突厥畏之見其赤馬稱為閃電趙注此言

馬行如電舉國皆知耳舊引傳玄詩童女掣電策童男

挽雷車非其義 孫楚詩傾城遠追送注傾猶盡也
古樂府青絲纏馬尾黃金絡馬頭 漢西域傳百官送
至橫門外三輔黃圖長安城北由西頭第一門曰橫門
其外有橋曰橫橋程大昌雍錄自橫門渡渭而西即是
趨西域之路 遠注出橫
門道言欲馳驅於戰場

張繼曰凡詩人題咏必胸次高超下筆方能卓絕此
詩雄姿未受伏櫪恩猛氣猶思戰場利青絲絡頭為
君老何由却出橫門道如此狀物不唯格韻特高亦
見少陵人品若曹唐病馬詩一朝千里心猶在曾敢
潛忘秣飼恩乃乞兒語也 王嗣奭曰與人心成一
大功此盛贊馬德即所謂真堪託死生也下文猛氣
思戰場萬里看流血壯兒不敢騎却出橫門道節節
俱蒙此意寫得雄駿絕倫語不驚人死不休洵足空
前絕
後矣

胡應麟曰七言古詩概曰歌行余漫考之歌之名義由來遠矣南風擊壤興於三代之前易水越人作於七雄之世而篇什之盛無如騷之九歌皆七古所始也漢則安世房中郊祀鼓吹咸係歌名竝登樂府或四言上規風雅或雜調下倣離騷名義雖同體裁則異孝武以還樂府大演隴西豫章長安京洛東西門行等不可勝數而行之名於是著焉較之歌曲名雖小異體實大同至長短燕鞠諸篇合而一之不復分別又總而目之曰相和等歌則知歌者曲調之總名原於上古行者歌中之一體創自漢人明矣又曰今人例以七言長短句為歌行漢魏殊不爾也諸歌行有三言者郊祀歌董逃行之類四言者安世歌善哉行之類五言者長歌行之類六言者上留田安薄命之類純用七字而無雜言全取平聲而無仄韻則栢梁始之燕歌白紵皆此體自唐人以七言長短為歌行餘皆別類樂府矣又曰歌行兆自大風垓下

四愁燕歌而後六代寥寥至唐大暢王楊四子婉轉
流麗李杜二家逸宕縱橫又曰闔閭縱橫變幻起
忽疾雷震電淒風急雨歌也位置森嚴筋脉聯絡走
月流雲輕車熟路行也太白多近歌少陵多近行
又曰李杜歌行衍齊梁而暢之而富麗有餘
及盧駱歌行行齊梁而暢之而富麗有餘

冬日洛城北謁玄元皇帝廟

鶴注天寶二年三月
壬子親祀玄元廟改

西京玄元廟為太清宮東京廟為太微宮天下為
紫微宮據舊史改廟為宮已在二年題曰玄元皇
帝廟仍舊稱也五聖聯龍袞是天寶八載閏六月
事題云冬日當是其冬作蓋天寶九載公歸長安
進三大禮賦不在洛陽矣朱注此詩所詠即太微
宮也作於加諡五聖之後當在八載之冬封演
見聞記高祖武德三年晉州人吉善行於羊角山
見白衣老父呼謂曰為吾語唐天子吾是老君即

汝祖也 今年無賊天下太平高祖即遣使致祭立廟其地 唐書高宗乾封元年幸亳州詣老君廟

追尊為玄元皇帝開元二十九年制兩京諸州各置玄元皇帝廟天寶元年陳王府叅軍田同秀上書玄元皇帝降於丹鳳門之通衢告錫靈符在尹喜故宅上遣使就函谷關尹喜臺西發得之乃置玄元廟於大寧坊東都於積善坊臨淄舊邸親享新廟

配極玄都閔憑高

一作虛

禁籙

一作禦 正異作籙

長守祧嚴具禮

掌節鎮非常碧瓦初寒外金莖一氣旁山河扶繡戶日

月近雕梁

首段記廟制之尊嚴云配極洙曰廟在北却

趙曰廟在洛城北故山故云憑高 趙曰

尊老君為聖祖故謂守祧符驗以備非常故得掌節碧瓦外覆寒氣先侵矣金莖旁列一氣上通矣山河拱

戶形其雄壯日月近梁狀其高華史記始皇為極廟象天極索隱曰為宮廟象天極故曰極廟李嶠詩配極
光輝遠康駢劇談錄東都北邙山有玄元觀南有老君廟臺殿高敞下瞰伊洛道藏道君處大玄都坐高
蓋天雲笈七籤三洞經玄都上有九曲岐增鳳臺瓊房
玉室處於九天之上玉京之陽張正見詩玄都府內駕
青牛詩閼宮有洙注閼渙閉也王僧孺詩憑高且
一望羽獵賦禁禦所營漢紀注獮者禁苑之遮衛也
後漢紀注折竹以繩懸連之使人不得往來今作籟
周禮守祧掌守先王先公之廟祧注遷主所藏曰祧
唐書老君廟置令丞各一員史記蕭何曰王若欲拜大將具禮乃可此借用字周禮掌節掌守邦節而辯
其用注節猶信也行者所執之信史記備他盜之出入與非常也亦借用字劉駒駘詩縹碧以為瓦碧瓦
琉璃瓦也謝靈運燕歌行孟冬初寒節氣成西都
賦抗仙掌以承露擢雙立之金莖注金莖銅柱也郊祀

志漢武作柏梁銅柱承露仙人掌之屬朱注曹子建集
明帝詔有司鑄銅建承露盤於芳林園莖長十二丈大
十圍使植作頌銘則洛城金莖固有之矣莊子通天
下一氣耳西征賦化一氣而甄三才陳後主詩日月
光天德山河壯帝居舞影賦耀金波仙李蟠根大猗
兮繡戶檀約陽春歌白日映雕梁

蘭奕葉光世家遺

一作

舊史道德付今王

此推言廟祀
之由唐奉

老君為聖祖故言根大而葉盛史記不載於世家故云
遺舊史明皇嘗注道德經故云付今王神仙傳老子
生而能言指李樹曰以此為我姓老子內傳太上老君
姓李名耳字伯陽其母見日精下落如流星飛入口中
因有娠七十二歲於陳渦水李樹下剖左掖而生述
異記中山有縹李大如拳者呼為仙李又云瀨鄉老子
祠有紅縹李一李二色唐太宗探得李詩云盤根植
瀛渚交榦倚天舒庾信老子廟詩盤根古樹底漢武

故事帝以乙酉年七月七日旦生於猗蘭殿先是景帝坐崇芳閣見赤氣如林來蔽戶牖乃改閣為猗蘭殿

曹植王仲宣誄伊昔顯考奕葉佐時注奕不絕之稱唐會要開元二十三年敕升老子莊子為列傳首居伯

夷之上西京賦雅好博古學乎舊史氏史記老子著書上下篇言道德之意五千餘言封演聞見記開

元二十一年明皇親注道德經畫手看前輩吳生遠

今學者習之書今王嗣有令緒聲

擅塲森羅移地軸妙絕動宮牆五聖聯龍衮千官

列一作雁行音杭冕旒俱秀發旌旆盡飛揚此記繪畫之精工移地

軸言山水逼真動宮牆言殿宇生色冕旒承龍衮從衣及冠也旌旆承千官由扈從及儀仗也原注廟有吳道子畫五聖圖朱景玄名畫錄吳道玄字道子東京陽翟人明皇知其名召入內供奉吳生凡畫人物佛像

神鬼禽獸山水臺殿草木皆冠絕於世國朝第一歷代
名畫錄吳道子學書不成因工畫張懷瓘每云吳生之
畫下筆有神是張僧繇後身官至寧王友孔融與曹
操書今之少年喜誇前輩東京賦秦政利箭長距終
得擅場曹植詩常得擅此場黃山谷云能於前輩中
擅場不獨爭長時輩也肇論萬象森羅海賦地軸
挺拔而爭迥春秋元命苞地有三千六百軸互相牽制
續晉陽秋顧愷之尤好丹青妙絕於時應璩詩侈
靡在宮牆通鑑天寶八載六月上以符瑞相繼皆祖
宗休烈上高祖謚曰神堯大聖皇帝太宗謚曰文武大
聖皇帝高宗謚曰天皇大聖皇帝中宗謚曰孝和大聖
皇帝睿宗謚曰玄貞大聖皇帝康駢劇談錄玄元觀壁
上有吳道子畫五聖真容及老子化胡經事丹青絕妙
古今無比淮南子此五聖者天下之盛王禮器天
子龍衣荀子天子十官記兄之齒雁行又天子
之冕朱綠藻十有二旒沈佺期詩朝光映冕旒蜀都

賦王褒肆華而秀發孔德璋詩風交翠柏淡留景與
旌旆揚漢高帝歌大風起兮雲飛揚

同紅梨迥得霜風箏吹玉柱露井凍

英華作動

銀床

此兼敘冬日之

景

柏耐寒而色留梨得霜而葉落吹玉柱風冽簷前凍銀床冰凝井榦也水經注翠柏陰峯謝朓松賦

懷風音而送聲當月路而留景庚肩吾詩梨紅大谷晚郭知達注風箏謂挂箏於風際風至則鳴也楊慎

丹鉛錄古人殿閣簷稜間有風琴風箏皆因風動成音自叶宮商或曰風箏簷鈴也俗謂呼風馬兒宋注唐人

有風箏詩前說是李白詩兩廊振法鼓四角吟風箏柳惲詩秋風吹玉柱袁淑正情賦陳玉柱之鳴箏趙

曰露井露地之井古樂府桃生露井上樂府淮南王篇後園鑿井銀作牀金瓶素綆汲寒漿庾肩吾詩銀牀

落井桐朱注舊以銀牀為井欄名義考銀牀乃輓轆架非井欄也

身退卑周室經傳拱

漢皇谷神如不死養拙更何鄉

一作方未乃追論老子以見責祀之不經

身退二句言人往而道存谷神二句言神藏而迹隱結舍諷意

此章起首中間各八句前後三段各四句

老子道德經功成名遂身退天之道列仙傳老子生於殷時為周柱下史轉為子藏史積八百餘年後周德

衰乃乘青牛車而去入大秦孔叢子今周室卑微高士傳經傳世國老氏聖紀圖河上公授漢文帝道

德二經旨與帝齋戒受之神仙傳漢孝景讀老子經有所不解以問河上公公乃投素書二卷拱漢皇謂端

拱而受此書老子谷神不死是謂玄牝按谷神謂身中空竅處有元神也即丹田之說故庾信詩云虛無養

谷神舊解谷為養則谷神上不當更加養字矣潘岳閒居賦仰衆妙而絕思終優游以養拙莊子何不樹

之於無何有之鄉

張耒臣珊瑚鈎詩話陳無已先生語余曰今人愛少陵詩一句之內至竊取數字以髣像之非善學者學詩之要在乎立格命意用字而已予曰如何等是曰冬日謁玄元皇帝廟詩敘述功德反覆伸意事核而理長闌中歌辭致峭麗語脉新奇句清而體好茲非立格之妙乎江漢詩言乾坤之大腐儒無所寄其身縛雞行言難盡得失不如兩忘而寓於道茲非命意之深乎贈希魯云輕身一鳥過力在一過字徐步詩云花葉上蜂鬚力在一上字茲非用字之精乎學者體其格高其意練其字則自然有合矣何必規規然髣像之乎

故武衛將軍挽詞三首

此詩梁氏編在天寶十四載是年十一月安祿山已

反而詩中並無傷亂之詞知其非此時矣黃氏據通鑑八載冬冰合遂以此証黃河十月水按詩意

本謂塞外河冰引証未合大抵屬未亂以前之詩
其年數已不可考矣又按開元天寶間府兵罷折
衝停民間扶兵器者有禁王者今無戰正指其時
蓋天寶六七載時在京師作也自此以後邊將多
尚戰功矣鶴注武衛將軍之名起於魏許楮唐
書左右武衛大將軍各一員將軍各一員掌統領
宮禁警衛之法譙周法訓挽歌出於
田橫之門人挽柩而行因謂之挽歌

嚴警當寒夜前軍落大星壯夫思敢

一作陳作敢

決哀詔惜

精靈王者今無戰書生已勒銘封侯意疎濶編簡為

去聲

誰青

首章記初喪情事

存足述夜落將星見其有關氣運敢決念生前

精靈傷死後無戰世際承平勒銘立碑墓道意疎濶衰
封絕望為誰青史簡足傳也杜臆封侯句無限感慨

與漢文帝惜李廣不遇時者同意 武衛主警衛宮禁
故云嚴警魏志太后令曰馳語大將軍得先嚴警 梁

武帝詩調校輟寒夜 諸葛武侯與步騭書僕前軍在
五大原 晉陽秋有星赤而芒角自東北往西南投於

諸葛亮營俄而亮卒 揚子壯夫不為 吳都賦舜禹
精靈留其山河 盧注是時罷府兵停折衝禁民間挾

兵器故云今無戰 淮南王安書王者之師有征無戰
晉書蘇峻傳少為書生有才學 蔡邕張伯雅祠堂

碑假石勒銘此謂墓銘也舊引班固作燕然山銘勒石
紀功未合 後漢梁竦傳大丈夫生當封侯死當廟食

賈誼鵬賦制度疎濶王右軍書論疎濶相間 劉
歆責太常書或脫簡或脫編劉孝標書青簡尚新

舞劍過 平聲 人絕鳴弓射 音石 獸能銛 音織 鋒行愜順猛噬失

躡 丘妖 騰赤羽 一作 千夫膳黃河十月冰橫 去聲 行沙漠

外神速至今稱

次章憶生前忠勇承上思敢決鋒利而師行皆順此劍之雄中箭而猛獸失

威此弓之捷操此絕技率衆渡河直能橫行沙漠矣杜臆行恆順謂所向如意失蹻騰謂應弦倒獸赤羽

旗下千夫會騰言孤軍深入塞外黃河十月冰凍見不避苦寒此正形容其橫行神速漢書項莊請以劍舞

前漢鼂錯傳皇太子材智高奇馭射伎藝過人絕遠陰鏗詩戰士夜鳴弓西京賦胸突鉅鋒西都賦

猗猗狡扼猛噬夢弼云猛噬猛虎之齧噬者盧注謂即飲羽意猶曹景宗云放箭如餓鷄叫澤中此欲配合鉅

鋒耳失之纖巧蹻騰壯躍之貌家語子路曰願得白羽若月亦羽若日注羽旗也按劉會孟以赤羽為塞

雁不知十月時雁已南翔矣千夫指軍士牧誓千夫長百夫長虞世南詩冰壯黃河絕前漢樊噲傳

臣願得十萬衆橫行匈奴中晉書張賓謂石勒曰用兵貴神速勿後時也

哀挽青門去新阡絳水遙路人紛雨泣天意颯風颭部

曲精仍銳匈奴氣不驕無由覩雄畧大樹日蕭蕭

三章想死

後餘威承上惜精靈上四言歸櫬堪傷下四言邊功猶在哀挽挽喪車而哀慟也三輔黃圖長安城東

出南頭第一門曰霸城門民見其青色因名青城門

崔融詩京兆新阡闢扶陽甲第開原涉傳京兆尹曹氏

墓茂陵謂京兆阡涉墓之起父冢表曰原氏阡阡墓表也水經注絳水出絳山西北流注於澮應劭曰絳水

出絳縣西南邵注絳州去長安六百里阮瑤詩悲聲感路人趙曰諸葛亮亡人皆野哭曹植詩延首嘆

息雨泣交頤尚德緩刑書以應天意庾仲初弔賈誼文鵬風獨喪爾雅風從下上曰颭光武紀注大將

軍營有五部三校尉部下有曲曲有軍候一人晉書劉牢之傳領精銳為前鋒精仍銳精力仍然勇銳也

通鑑燕梁琛謂符堅曰吳王垂雄畧冠世折衝禦侮大樹暗用馮異事見首卷

此詩次章云橫行沙漠外將軍蓋能立功邊外者首章則云封侯意疎濶末章又云大樹日蕭蕭是能功而不伐者異於邊將之邀功生事矣公特表而出之以致深惜焉

贈翰林張四學士

音既 鶴注天寶十三載太

常卿題云贈翰林張學士則在未貶司馬前詩云此生任春草垂老獨漂萍意是天寶九載自河南歸時作是時未獻賦故詩不及之梁權道編在十四載非舊唐書張說傳二子均均皆能文唐

會要玄宗始選朝官有詞藝學識者入居翰林供奉別旨制詔書敕猶或分在集賢開元二十六年始以翰林供奉改稱學士別建學士院俾專內命太常少卿張均起居舍人劉光謙等首居之而集

賢所掌由
是罷息

翰林逼華蓋鯨力破滄溟天上張公子宮中漢客星

首

翰林張垺 逼華蓋其位高破滄溟其勢大宰相之子
故云公子垺尚公主故比客星 唐會要翰林院在銀

臺門內麟德殿西廂重廊之後學士院在翰林院之南
別戶東向 晉天文志大帝上九星曰華蓋所以蔽覆

大帝之座也蓋下九星曰杠蓋之柄也蔡邕傳擁華蓋
而奉皇極 洙曰逼言密邇帝座 海賦魚則橫海之

鯨突兀孤游吳都賦嶽鯨背中於羣摎注嶽鯨魚之有
力者 趙曰破如宗慤所云乘風破浪之破 謝朓箋

滄溟未運波臣自蕩 漢書成帝時童謠曰燕燕尾涎
涎張公子時相見帝每微行出常與張放俱稱富平侯

家故曰張公子 蜀志出師表宮中府中皆為一體
後漢書光武與嚴光共卧太史奏客星犯帝座甚急

宗慄荆楚歲時記漢武帝令張騫使大夏尋河源乘槎經月而至一處見一女織一丈夫牽牛飲河織女取支機石與騫而還庾肩吾江州詩漢使俱為客星槎共逐流虞茂賦昆明池織女石詩船疑海槎渡珠似客星來徐陵詩張星舊在天河上由來張姓本連天俱用此事張遠注此乃切張姓而用舊引嚴光與此不切今按公贈太常卿張垧詩能事聞重譯嘉謨及遠黎蓋嘗奉使於外故有宮中漢客星句耳舊唐書垧尚寧親公主玄宗特加恩寵許於禁中置內宅侍為文章賦詩拾翠殿佐酒望雲亭紫誥

仍兼綰黃麻似六經內頌舊作頌一作分金帶赤恩與荔枝青

次敘才華寵遇賦詩二句居禁地也紫誥二句優文翰也內分二句多恩眷也魏文帝詩賦詩以寫懷

兩京新記大福殿在麟德殿北拾翠殿在大福殿東南漢高帝本紀上置酒沛宮召故人父老子弟佐酒應

劭曰助行酒長安志大福殿拾翠殿西內延嘉殿西
北有景福臺臺西有望雲亭王洙注紫誥謂以紫泥
封誥黃麻謂寫誥詞於黃麻紙上隴右記武都紫水
有泥其色紫而粘用貢封璽書故詔誥有紫泥之美西
京雜記漢以武都紫泥為璽室加綠綈其上唐會要
中書以黃白二麻為綸命重輕之辨開元三年十月始
用黃麻紙寫詔上元三年二月制敕並用黃麻紙李肇
翰林志故事書舍人專掌詔誥開元間始置學士大
事直出中禁不由兩省凡制用白麻紙詔用白藤紙書
用黃麻紙東都賦按六經而校德鶴注制誥本集
賢學士領之今翰林學士得分掌故云兼館寫誥詞於
黃麻訓詞謹嚴如六經薛蒼舒曰自別置學士院以
專掌內命其後選用益重而禮遇益親至號為內相凡
充其職者無定員自諸曹尚書下至校書郎皆得與選
入院一歲則遷知制誥班矣內宴則居宰相之下一品
之上唐書緋為四品服淺緋為五品服並金帶但鞞

數別朱注唐書貴妃嗜生荔枝明皇置驛傳送尚
主宅在禁中得與此賜所謂恩與荔枝青也海錄碎事
載戎州出綠荔枝肉熟而皮猶綠曾子固荔枝狀云江
家綠出福州又色紅而有青斑者名虎皮亦出福州荔
枝青殆即此類乎舊注引楊文公談苑荔枝金帶乃是
宋制且與上句複出李肇國史補張均兄弟俱在翰
林垣以尚主獨賜珍玩以誇於均均曰無復扶又隨高
此乃婦翁與女婿固非天子賜學士也切

鳳空餘泣聚螢此生任

讀平聲

春

讀上聲周禮梓人春以功

草垂老獨

漂萍儻憶山陽會悲歌在一聽

平聲

贈詩意

末乃自敘結出不能隨風高

騫依然聚螢勵志耳春草數卑微漂萍傷流落山陽會
望其念舊聽悲歌諷其汲引此章四句起下二段各
六句詩鳳凰鳴矣于彼高岡顏延之秋胡詩椅梧傾
高鳳晉書車胤家貧不常得油夏月以練囊盛數十

螢火照書讀顏氏家訓古人勤學照雪聚螢
詩既看春草歇蔡邕房楨碑享年垂老鮑令暉詩
流漂萍無根魏氏春秋嵇康寓居河內山陽與王戎
向秀同遊秀後經康山陽舊居作思舊賦史記項羽
紀悲歌慷慨韓
非子一聽而公會

樂

音洛

遊園歌

英華題作晦日賀蘭楊長史筵醉歌
張綆曰天寶十載公獻賦詔試集

賢院為宰相所忌得參列選序詳詩中聖朝已知
賤士醜似當在此歲作鶴注唐以正月晦日三
月三日九月九日為三令節德宗時李泌請廢正
月晦日以二月朔為中和節漢書神爵三年起
樂遊苑注三輔黃圖云在杜陵西北長安志樂遊
苑在京兆萬年縣南八里亦曰樂遊原洙曰西京
記樂遊園漢宣帝所立唐長安中太平公主於原
上置亭遊賞其地四望寬敞每三月上巳九月重

陽士女戲就此被襖登高幄幕雲布車馬填塞虹
彩映日馨香滿路朝士詞人賦詩翌日傳於京師

樂遊古園翠

昨律切一作華

森爽煙綿碧草萋萋長

丁丈切

公子

華筵勢最高秦川對酒平如掌

首從宴園叙起木森草碧言近景秦川如掌

言遠景惟地勢高故一望皆見

翠山危峻貌子虛賦

隆崇崒崒森爽森疎而爽豁也鮑照詩岫遠雲烟

綿谷屈泉靡迤江淹別賦春草碧色楚辭芳草生

今萋萋公子指楊長史楚辭思公子兮不敢言三

秦記長安正南秦嶺嶺根水流為秦川一名樊川周王

衆詩遙遙秦川水曹孟德詩對酒當歌長安志樂

遊原居京城之最高四望寬敞京城之

內俯視如掌沈佺期詩秦地平如掌

長生木瓢示

樂作

一作

真率更調鞍馬狂

一作

一作

歡賞青春波浪芙蓉園白日

雷霆夾

一作甲

城仗閭闔晴開

大結切舊作映趙

蕩蕩

曲江翠幙排銀榜拂水低回舞袖翻綠雲清切歌聲上

上聲

次記園中景事

酌瓢之後調馬而行得以盡

覽諸勝

芙蓉苑夾城道曲江池此明皇遊幸之處仗過

門開翠幕銀榜舞袖歌聲皆園前所聞見者杜臆西

京雜記載上林苑有長生木蓋以木為瓢也晉嵇含有

長生木賦鄴中記金華殿後種雙長生樹八九月乃生

花花白子黑大如橡子世人謂之長生樹世說王懷

祖直以真率少許便足對人多多許抱朴子馬不調

造父不能超千里之迹謝靈運歌行心歡賞兮歲易

淹曹植詩白日曜青春張禮遊城南記芙蓉園在

曲江西南與杏園皆秦宜春下苑地園内有池謂之芙

蓉池唐之南苑也兩京新記開元二十年築夾城入

芙蓉園自大明宮夾亘羅城複道經通化門觀以達興

慶宮次經春明延喜門至曲江芙蓉園 易鼓之以雷
霆 楚辭倚閭闔而望予 漢禮樂志天門開詠蕩蕩

漢書注詠讀如迭又舊注詠緩也於義不切如淳云詠
蕩蕩天體清堅之狀亦於詠字無涉一本作決猶云蕩

決也 潘岳籍田賦翠幙黝以雲布北史姚萇張翠幙
繡簾挂金篆銀榜張正見詩銀榜映仙宮 潘尼詩倉

卒低迴 張正見詩舞袖飄金谷歌聲繞鳳臺 魯靈
光殿賦緣雲上征 飛燕外傳音詞舒閑清切 西京

雜記高帝令戚夫人作出塞望 却憶年年人醉時只今
歸之曲後宮齊唱聲入雲霄

未醉已先悲數莖白髮那拋得百罰一作刻 淡杯辭從英華一

亦一作潮 不辭聖朝一作但 知賤士醜一物但從英華一作自 荷

去一作私 皇天慈 此身飲罷無歸處獨立蒼茫自咏詩 乃

借酒遣懷 上四數年衰下四慨不遇也 朝已見棄
而天猶見憐 假以一飲之緣其無聊亦甚矣 此章四
句起下兩段各八句 列子景公舉杯自罰 陳後主
詩杯淡猶恨稀 後漢馮衍說鄧禹書聖朝享先舜之
榮 揚子曰秦之士也賤陸機云玄冕無醜士 一物
指酒猶陶公云杯中物江淹詩一物之微有足悲者
楚辭皇天無私阿兮 庾信詩蒼茫落餘暉朱異詩值
塞野之蒼茫 趙注以蒼茫為荒寂貌杜臆謂蒼茫詠
詩乃勃然得意處引公詩蒼茫興有神為証
今按上文語涉悲涼末作發興語方見後勁

同諸公登慈恩寺塔

鶴注梁氏編在天寶十三載不知何據應在祿山陷京師

之前十載奏賦之後 原注時高適薛據先有作
兩京新記京城東第一街進昌坊慈恩寺隋無
漏寺故地西院浮屠六級高三百尺永徽三年沙
門玄奘所立長安志慈恩寺在萬年縣東南八里

高標跨蒼穹

一作天

烈風無時休自非曠

一作壯

士懷登茲

翻百憂

首言墟不易登領起全意

蜀都賦陽鳥迴翼乎高標

爾雅

穹蒼蒼天也郭璞曰天形穹窿其色蒼蒼丹元子步天歌昭昭列象布蒼穹古樂府暮秋烈風起鮑照詩

安知曠士懷王粲登樓賦登茲樓以四望今聊暇日以銷憂此云翻百憂蓋翻其語也詩逢此百憂方

知象教力足

一作立

可追冥搜仰穿龍蛇窟始

音出

英華作驚

枝撐幽

此敘登墟之事

象教建墟者冥搜登墟者穿

墟出穴所謂冥搜也盧注磴道屈曲如穿龍

蛇之窟歷盡盤錯始出枝撐之幽王巾頭陀寺碑正法既沒象教凌夷注象教言為形象以教人也孫綽

天台山賦序夫非遠寄冥搜何肯遙想而存之謂此墟真可追攀而冥搜也王延壽魯靈光殿賦枝撐杈

朽而斜據注枝撐交木也黃山谷曰七星在北戶一作戶北

河漢聲西流羲和鞭白日少昊行清秋秦一作秦非山忽

破碎湮渭不可求俯視但一氣焉於虔切能辯皇州此記登塢

之景上四仰觀於天見象緯之偏近下四俯視於地見山川之微渺總是極摹其高星河夜景西流秋候

之象羲和畫景鞭日秋光短促也忽破碎謂大小錯雜不可求謂清濁難分皇州莫辯薄暮陰翳矣史記天

官書北斗七星所謂璇璣玉衡以齊七政春秋運斗樞斗第一天樞第二璇第三璣第四權第五衡第六開陽

第七璣光吳都賦開北戶以向日古詩河漢清且淺廣雅天河謂之天漢亦曰河漢魏文帝詩天漢回

西流楚辭吾令羲和弭節王逸注羲和日馭也又白日昭只月令孟秋之月其帝少昊潘尼詩朱明送

夏少昊迎秋殷仲文詩獨有清秋日 朱注秦山指終南諸山廣輿記藍田有秦嶺乃南山之脊若隴西秦

山與此相去甚遠賈誼早雲賦正雲布而雷動兮相擊衝而破碎 詩涇以渭濁鮑照詩涇渭不可雜鶴注

涇渭乃關西大川韋朝宗引渭水入金光門置漕於西市魏文帝詩俯視清水波 西征賦化一氣而甄三

才鮑照詩表裏望 皇州皇州帝都也 迴首呼虞舜蒼梧雲正愁惜哉瑤

池飲一作燕 日晏一作宴 崑崙丘黃鵠去不息哀鳴何所投

君看隨陽雁各有稻粱謀末乃登壇有感所謂百憂也 迴首二句思古以虞舜蒼

梧比太宗昭陵也惜哉二句傷今以王母瑤池比太真溫泉也朱注末以黃鵠哀鳴自比而歎謀生之不若陽

雁此蓋憂亂之詞 此章前二段各四句後二段各八句 上槩詩回首望長安 杜詩博議高祖號神堯皇

帝太宗受內禪故以虞舜方之朱注兩京新記載慈恩寺浮屠前階立太宗三藏聖教序碑迴首叫舜寓意在太宗舊謂泛思古聖君者非也記舜堊於蒼梧之野山海經南方蒼梧之丘蒼梧之淵中有九疑山舜所堊在長沙零陵界中文選注歸藏啟筮有白雲出自蒼梧入於太梁謝朓詩雲去蒼梧野江總詩雲愁數處黑

崙

程嘉燧曰

明皇遊宴驪山皆貴妃從幸故以日晏崙崙諷之

魏文帝詩惜哉時不遇列子穆王升崑崙

之丘以觀黃帝之宮遂賓於西王母觴於瑤池之上乃觀日之所入日行萬里鮑照詩夕飲乎瑤池史記張

湯傳日晏天子忘食韓詩外傳田饒謂魯哀公曰夫黃鵠一舉千里止君園池啄君稻梁君猶貴之以其從

來遠也故臣將去君黃鵠舉矣晉黃鵠曲黃鵠參天飛半道還哀鳴沈約詩驚屠去不息禹貢陽鳥攸居

注隨陽之鳥

鴻雁之屬

三山老人胡氏曰此詩譏切天寶時事也秦山忽破
碎喻人君失道也涇渭不可求言清濁不分也馬能
辨皇州傷天下無綱紀文章而上都亦然也虞舜蒼
梧思古聖君而不可得也瑤池日晏謂明皇方耽於
淫樂而未已也賢人君子多去朝廷故以黃鵠
哀鳴比之小人貪祿戀位故以陽雁稻梁刺之

同時諸公登壇各有題詠薛據詩已失傳岑儲兩作
風秀髮貼不愧名家高達夫出以簡淨品格亦自清
堅少陵則格法嚴整氣象崢嶸音節悲壯而俯仰高
深之景盱衡今古之識感慨身世之懷莫不曲盡篇
中真足壓倒羣賢雄視千古矣三家結語未免拘
束致鮮後勁杜於末幅另開眼界獨闢思議力量百
倍於人

岑參詩云塢勢如湧出孤高聳天宮登臨出世界磴
道盤虛空突兀壓神州崢嶸如鬼工四角礙白日七

層摩蒼穹下窺指高鳥俯聽聞驚風連山若波濤奔
走似朝東青松夾馳道宮觀何玲瓏秋色從西來蒼
然滿關中五陵北原上萬古青濛濛淨理了可悟勝
因夙所宗誓將掛冠去覺道資無窮 儲光羲詩云
金祠起真宇直上青雲垂地靜我亦閒登之秋清時
蒼蕪宜春苑片碧昆明池誰道天漢高逍遙方在茲
虛形賓太極攜手行翠微雷雨傍杳冥鬼神中踐踞
靈變在倏忽莫能窮天涯冠上閭闔開履下鴻雁飛
宮室低邈迤邐屏山小參差俯仰宇宙空庶幾了義歸
前劣非大廈从居亦以危 高適詩云香界泯羣有
浮圖宣諸相登臨駭孤高披拂欣大壯言是羽翼生
迥出虛空上頓疑身世別乃覺形神王宮闕皆戶前
山河盡簷向秋風昨夜至秦塞多清曠千里何蒼蒼
五陵鬱相望盛時慙阮步末官知周防輸效獨無因
斯焉可
遊放

投簡咸

一作咸非

華兩縣諸子

鶴云梁氏編在上元二年成都作蓋以成

為成都華為華陽唐志成都華陽兩縣為附郭乃次赤按詩云長安苦寒又言南山之豆東門之瓜皆長安京兆事其云故舊禮數絕又云棄擲與時異當是天寶十年召試後送隸有司叅選時作成華當作咸華蓋咸陽華原二縣也

赤縣官曹擁才傑軟裘快馬當冰雪長安

一作夜非

苦寒誰

獨悲杜陵野老骨欲折

首段有慨身世故老成落魄自稱

杜陵野老詩

作於長安明矣

赤縣官曹本謂長安貴人不指兩縣諸子蓋投簡諸子者另有其人也朱注誤認兩縣為赤

縣故有畿縣之疑正異不知長安即赤縣故欲改為長夜總錯在詩題成華二字耳元和郡縣志大唐縣有

赤畿望緊上中下六等之差京都所治為赤縣京之旁
邑為畿縣曹植賦在官曹之典列沈約詩吏部信

才傑前漢地理志杜陵屬長安古杜伯國宣帝葬此

因曰杜陵長安志杜陵今在奉先城東南二十五里

後漢李固傳霍光憂懷發憤悔之骨折南山豆苗早荒穢青門瓜地新凍

裂鄉里兒童項領成朝

音潮

廷故舊禮數絕自然棄擲與

時異况乃踈頑臨事拙饑卧動即向一旬敝

一作

衣何

啻聯百結君不見空牆日色晚此老無聲淚垂血

此自述饑

寒之狀

杜臆鄉里後輩挾勢驕人固不足責乃故舊

在朝而禮數亦絕尚何望乎踈懶任性公之致貧在此

公之立品亦在此又曰閭冗尊顯賢哲棄遺則時事可知
無聲淚血望諸子之推解也此章上四句下八句

欽定四庫全書

杜詩詳註

三

漢書楊惲傳田彼南山蕪穢不治種一項豆落而為其青門瓜注別見傳玄詩冬寒地為裂鄉里小

兒出陶潛傳詩四牡項領注項大也四牡者人所駕今但養大其領不肯為用後漢呂強傳羣邪項領膏唇

拭舌注自恣也任昉哭范僕射詩生平禮數絕嵇

康書匪降自天實由疎頑饑卧暗用袁安卧雪事嵇

王隱晉書董威輦拾殘繒結為衣號曰百結張協詩

青苔依空牆蔡琰胡笳哭無聲兮氣將咽又曰十拍

悲淡兮

淚成血

盧世淮曰投簡中入鄉里兒童數語意覺不平然是

一片真氣激出不能隱忍不宜隱忍者也豈許曖曖

昧昧假敦厚革所敢望其邊際故曰詩可以怨

杜位宅守歲

鶴注詩云四十明朝過則是天寶十載為四十歲唐書世系表杜位出

襄陽房為考功郎中湖州刺史困學紀聞位李
林甫諸壻也年譜天寶十載林甫方在相位盍簪

列炬其炙手之徒與公集有寄杜
位詩題下原注位京中宅近西曲江

守歲阿戎

一作咸

家椒盤已頌花盍簪喧櫪馬列炬散林

鴉四十明朝過飛騰暮景斜誰能更拘束爛醉是生涯

上四守歲之事下四歲終有感趙汾云椒盤頌花位
宅設宴喧馬散鴉言同會者騎從之盛又云公年四

十進三大禮賦明皇命待制集賢院而未嘗授官此詩
除夕所賦後四句感慨豪縱讀之可想公之為人顧

注公目擊附勢之徒見位而偃僂俯仰不勝拘束故言
不能效此拘束之態惟有爛醉是吾生涯而已唐太

宗有守歲詩冬盡今宵促年開明日長孟浩然詩守歲
接清筵則知除夜守歲唐時風俗然也通鑑注晉宋

間人多呼弟為阿戎宋書謝惠連初不為父所知族兄靈運曰阿戎才悟如此而何作常兒遇之朱注南史齊王思遠小字阿戎王晏從弟也明帝廢立嘗規切晏及晏拜驃騎謂思遠兄思微曰隆昌之際阿戎勸吾自裁若如其言宜得有今日思遠曰如阿戎所見尚未晚也詩用阿戎蓋出此耳胡儼曰阿戎注家改為阿咸不知阿咸乃叔侄事與兄弟不相當東坡與子由詩欲喚阿咸來守歲林烏樞馬正誼譁亦一時誤用耳不必據以為証崔實四民月令過臘一日謂之小歲拜賀君親進椒酒從小起後世率於正月一日以盤進椒飲酒則撮置酒中號椒盤馬晉書劉琨妻陳氏元旦獻椒花頌曰標美靈葩爰采爰獻易豫四爻勿疑朋盍簪王弼解盍為合解簪為聚所以聚髮也此詩盍簪對列炬取朋友聚則解簪為聚所以聚髮也此詩盍簪對列炬取朋友聚合之義直作冠簪說矣陰鏗詩亭嘶背樞馬沈佺期詩歲炬常燃桂炬燭火也記四十曰強仕顧注言

四十自明朝而過則是年正四十也
夏侯湛抵疑今
吾子攀其飛騰之勢挂其羽翼之末
李尤詩年歲晚

暮日已斜
任昉詩拘束名
教裏
莊子吾生也有涯

敬贈鄭諫議十韻

鶴注此當是天寶十載奏賦後
作故有求顏閭厰稱衡之句梁

氏編在十一載為是
諫議大夫起於後漢韋彪
疏曰諫議之職應用公直之士是也續通典武后
龍朔二年改為正諫大夫開元
以來仍復凡四人屬門下省

諫官非不達詩義早知名破的由來事先鋒孰敢爭思

飄雲物外

一作
動

律中

去聲

鬼神驚毫髮無遺憾波瀾獨老

成

此贊鄭詩才
詩義知名乃通節之網破的如射之
中先鋒如戰之勇雲物外言思窮高遠鬼神驚言巧

奪化工洙曰曲盡物理故無遺憾才氣浩瀚故有波瀾
首言諫官雖達其知名實以詩重耳諫官二字見

蕭望之疏唐太宗詔每宰相入內平章大計必使諫官
隨入與聞政事詩序詩有六義庾信枯樹賦海內

知名世說王長史曰我往輒破的勝我庾翼謂謝尚
曰卿若破的當以鼓吹相賞易傳其所由來者漸矣

謝靈運詩由來事不同蜀志曹公使關羽為先鋒史
記張良傳慎毋與楚爭鋒左傳必書雲物王褒四

子講德論轉運中律詩序動天地感鬼神莫近於詩
鮑照詩毫髮一為瑕文賦恒遺恨以終篇爾雅

大波為瀾小波為淪鶴曰陸機文賦或沿波而討源或
龍見而鳥瀾波瀾二字本此又詩翻覆若波瀾曹植

魏武帝誄謀過老成毫髮無憾謂字句野人寧得所
斟酌波瀾老成謂通篇結構包大小而言

天意薄浮生多病休儒服冥搜信客旌築居仙縹緲旅

食歲崢嶸使

去聲

者求顏闔諸公厭禰

乃里切

衡

此自敘淪落野人

失所因浮生命薄也下六皆失所之狀不修儒服而但任客旌則行踪難定矣卜居無地而旅食多年則謀生不給矣求賢有詔而當事忌才則抱志莫伸矣鶴注使者二句指召試不遇言說苑苟可而行謂之野人漢主父偃傳彼人人喜得所息夫躬傳民心悅而天意得矣莊子其生也若浮庾信傳茂陵忽多病莊子魯少儒哀公曰舉國儒服冥搜謂搜尋幽勝謝靈運詩躡險築幽居海賦羣仙縹緲餐玉清涯崢嶸謂年齒日高舞鶴賦崢嶸而愁暮莊子魯君聞顏闔得道之士也使人以幣先馬闔對曰恐聽誤而遺使者罪不若審之使者還反審之復求之則不得已後漢書禰衡氣剛傲好矯時慢物曹操懷忿以才名不欲殺之送劉表表不能容以江夏太守黃祖性卞急送衡與之為所殺史記主父偃傳上不召留久諸

欽定四庫全書

杜詩詳註

五

公賓客將期一諾

或作語非

重歎

許勿切

使寸心傾君見途窮

哭宜憂阮步兵

末望諫議之汲引也

期諾於人而此

疾呼矣

此章前二段各八句後段四句收

一諾注

見首卷

鄭氏曰歎暴起也

吳邁遠詩寸心從此殫

沈約齊太尉王儉碑銘傾方寸以奉國阮籍傳籍率

意命駕不由徑路車跡所窮輒慟哭而返聞步兵厨人

善釀有貯酒三百斛

乃求為步兵校尉

王嗣爽曰他人贈諫議必用伏蒲廷諍等語公則止

贊其詩詞蓋自李林甫為相諫諍路絕故不作虛辭

以諛人此其立言有法也葛常之韻語陽秋曰詩

人讚美同志詩篇多比珠璣璧玉錦繡花草之類至

杜公豈肯作此陳腐語耶如寄岑參詩云意慙開飛

動篇終接混茫夜聽許十誦詩云精微穿溟滓飛動

推霹靂贈盧瑒詩云藻翰唯牽率湖山合動拙贈諫
議詩云毫髮無遺恨波瀾獨老成寄李白詩云筆落
驚風雨詩成泣鬼神贈高適詩云美名人不及佳句
法如何皆驚人語也視餘子其神芝之與腐菌哉

兵車行

杜臆舊注謂明皇用兵吐蕃民苦行役而作是也此當作於天寶中年周禮有

兵車之會

車轉轉馬蕭蕭行人弓箭各在腰耶娘妻子走相送塵

埃不見咸陽橋牽衣頓足攔

一作橋

道哭哭聲直上

上聲干

雲霄

首段敘送別悲楚之狀乃紀事下二段述征夫苦役之情乃紀言

轉轉衆車之聲蕭蕭鳴不喧嘩

人行役之人詩有車轉轉又蕭蕭馬鳴又行
人彭彭披神記李楚賓帶弓箭遊獵古樂府不聞

耶孌哭子聲但聞黃河水鳴滅滅魏文帝詩妻子牽衣袂楚辭蒙世俗之塵埃元和郡縣志便橋在

咸陽縣西南十里以與便門相對因名漢武帝造中渭橋在咸陽縣東南二十里本名橫橋秦始皇造皆架渭

水一統志便橋唐時名咸陽橋何遜詩兒女牽衣泣國策張儀說秦頓足徒裼酷吏傳路溫舒頓足而嘆

雲霄而直上北山移文千道旁過者問行人行人但云點行頻或

從十五北防河便至四十西營田去時里正與裏頭歸

來頭白還

英華作猶

戍邊邊庭

英華作庭一作亭

流血成海水武

一作

我皇開邊意未已君不聞漢家山東二百州千邨萬落

生荆杞縱有健婦把鋤犁禾生隴畝無東西况復

扶切又

秦兵耐苦戰被

去聲

驅不異夫與難

次提過者行人設為問答而以君不聞數

語作收應

曰防河曰營田曰戍邊所謂點行類也開邊未已讖當日之窮兵至於邛落蕭條夫征婦耕則民

不聊生可知本言秦兵而兼及山東見無地不行役矣

古樂府詞觀者盈道旁

師氏曰點行漢史謂之更

行以丁籍點照上下更換差役

唐食貨志開軍府以捍要衝因隙地以置營田有警則以軍若夫千人助役

杜臆營田乃戍卒備吐蕃者韓非子里正與伍老海錄碎事唐制凡百戶為一里里置正一人二儀實錄

古以皂羅三尺裹頭曰頭巾周武帝裁為襖頭鮑氏曰時老幼俱戰亡又括鄉里之少小者故里正為之裹頭

掇甲也韓駒曰歸來頭已白又屯戍邊疆言役使無已時也史記中國擾亂諸秦所徙戍邊者皆復去後漢

書卧鼓邊庭

史記蔡澤傳流血成川

杜臆唐鑑天寶六載帝欲使王忠嗣攻吐蕃石堡城忠嗣上言石堡

險固非殺數萬人不能克帝不快董延光白請取石堡
帝命忠嗣分兵助之不克八載帝使哥舒翰攻拔之士
卒死者數萬故有邊城流血等語班固曰武帝廣開
三邊謝靈運詩辭殫意未已漢書漢家自有制度
黃希曰古所謂山東即今之河北晉地是也今所謂
山東古之齊地青齊是也閻璩曰此謂華山以東不指
泰山之東亦不指太行之東秦時河山以東強國六皆
山東地十道四蕃志關以東七道凡二百一十七州
杜臆云隋得天下改郡為州唐又改州為郡凡一百九
十二郡曰州仍舊名也曰二百州已盡天下矣世說
陸士衡入洛次河南偃師逆旅姬曰此東數十里無邨
落阮籍詩堂上生荆杞邵注兵亂地荒盡生荆棘枸
杞王彥輔曰健婦耕則夫遠征可知古樂府健婦持
門戶亦勝一大夫王粲詩不能效沮溺相隨把鋤犁
史記項羽起隴畝之中師氏曰疆場不修故東西
莫辨史記正義南北為阡東西為陌杜臆秦兵即關

中之兵正此時黥行者因堅勁耐戰故驅之尤迫今驅
負耒耜者為兵直棄之耳與犬鷄何異孔叢子秦兵將至

戰駱兵王詩龍庭但苦長丁大切者雖有問役夫敢伸恨

且如今年冬未休關一作隴西卒一云役夫心益憤如今縱得休還為隴西卒

縣官急索先側切租草堂本作縣官云急索租稅從何出信知生男

惡反是生女好生女猶得嫁比頻脂切鄰生男一作兒埋沒

隨百草君不見青海頭古來白骨無人收新鬼煩冤舊

鬼哭天陰雨濕聲一作悲啾啾再提長者役夫申明問答而以君不見數語作總結

未休戌卒應上開邊未已租稅何出應上邨落荆杞
生男四語因前爺娘妻子送別而為此永訣之詞青海

鬼哭則驅民鋒鏑之禍至此極矣此章是一頭兩腳
體下面兩扇各有起結各換四韻各十四句條理秩然
而善於曲折變化故從來讀者不覺耳曲禮長者問
不辭讓而對非禮也左傳呼役夫戴嵩詩召募取
關西鶴注通鑑天寶九載冬十二月關西遊奕使王難
得擊吐蕃克五城拔樹敦城漢食貨志縣官當衣租
食稅而已史記索隱謂國家為縣官者畿內縣即國都
王者官天下故曰官也嚴助傳租稅之收足以給乘
輿之御朱注名隸征伐則當免其租稅矣今以遠戍之
身復督其家之輸賦豈可得哉與健婦鉏犁二語相應
陳琳詩生男慎莫舉生女哺用脯漢衛皇后歌生男
無喜生女無怒孔融書州里比隣知之最早周禮族
師五家為比又遂人五家為隣庾信哀江南賦身名
埋沒江淹詩零落被百草哥舒翰傳築神威軍於
青海上吐蕃至攻破之又築城於龍駒島以人二千戍
之由是吐蕃不敢近青海水經注金城郡南有湟水出

塞外又東南經卑禾羗海世謂之青海舊唐書吐谷渾有青海周回八九百里高宗龍朔三年為吐蕃所併儀鳳中李敬玄與吐蕃戰敗於青海開元中王君奭張景順張忠亮崔希逸皇甫維明王忠嗣先後破吐蕃皆在青海西梁橫吹曲尸喪狹谷中白骨無人收左傳夏父弗忌曰吾見新鬼大故鬼小鮑照詩煩冤荒隴側後漢陳寵為太守洛陽城每陰雨常有哭聲晉歌曲天陰不作雨漢樂府鳴聲何啾啾周注啾啾猶言唧唧鳴咽聲也

單復曰此為明皇用兵吐蕃而作故託漢武以諷其辭可哀也先言人哭後言鬼哭中言內郡凋弊民不聊生此安史之亂所由起也吁為人君而有窮兵黷武之心者亦當為之惻然興憫惕然知戒矣王道俊杜詩博議王淡父云時方用兵吐蕃故託漢武事為刺此說是也黃鶴謂天寶十載鮮于仲通喪師瀘

南制大募兵擊南詔人莫肯應楊國忠遣御史分道
捕人連枷送詣軍前故有牽衣頓足等語按明皇季
年窮兵吐蕃徵戍驛騷內郡幾徧當時點行愁怨者
不獨征南一役故公託為征夫自愴之詞以譏切之
若云懼楊國忠貴盛而詭其詞於關西則尤不然太
白古風云渡瀘及五月將赴雲南征怯卒非壯士南
方難遠行長流別嚴親日月慘光晶泣盡繼以血
心摧雨無聲已明刺之矣太白胡獨不畏國忠耶
蔡寬夫曰齊梁以來文士喜為樂府詞往往失其命
題本意烏生八九子但詠烏雉朝飛但詠雉雞鳴高
樹顛但詠雞大抵類此甚有并其題而失之者如相
府蓮訛為想夫憐楊婆兒訛為楊叛兒之類是也雖
李太白亦不免此唯老杜兵車行悲青坂無家別等
篇皆因時事自出已意立題畧不更蹈前人陳迹真
豪傑也海寧周句曰少陵值唐運中衰其音響節
奏駸駸乎變風變雅與騷同功唐非無詩求能仰窺

聖作裨益世教如少陵者鮮矣胡應麟曰六朝七
言古詩通章尚用平韻轉聲七字成句讀未大暢至
於唐人韻則平仄互換句則三五錯綜而又加以開
闔傳以神情宏以風藻七言之體至是大備矣又
曰少陵不效四言不做離騷不用樂府舊題是此老
胸中壁立處然風騷樂府遺意杜往往得之太白以
百憂等篇擬風雅鳴皋等作擬離騷俱相去懸遠樂
府奇偉高出六朝古質不如兩漢較輸杜一籌也
又云樂府則太白擅奇古今少陵嗣迹風雅蜀道難
遠別離等篇出鬼入神恟恍莫測兵車行新婚別等
作述情陳事懇惻如見張王欲以拙勝所謂
差之釐毫溫李欲以巧勝所謂謬以千里

前出塞九首

杜臆前出塞云赴交河後出塞云赴
薊門明是兩路出兵考唐之交河在

伊川西七百里當是天寶間哥舒翰征吐蕃時事
詩亦當作於此時非追作也張綖注單復編在

開元二十八年黃鶴以為乾元時思天寶間事而
作今依范編在天寶年間晉樂志出塞入塞曲
李延年造胡夏客曰前後出塞詩題不言出師
而言出塞師出無名為國諱也可為詩家命題之
法當時初作九首單名出塞及後來再作五首
故加前後字以分別之舊註見題中前後字遂疑
同時之作誤矣

戚戚去故里悠悠赴交河公家有程期亡命嬰禍羅君

已富土境開邊一何多棄絕父母恩吞聲行負戈

首章敘初

發時辭別室家之情張綖注前四敘事見在下者之
率義後四敘情見在上者之不仁蓋富土開邊事之可
已棄絕親恩人之大情為人上者亦獨何心哉杜臆
已富而又開邊乃諷刺語亦國家安危所係此下諸

章皆代為從軍者之言 楚辭居戚戚而不可解 顏
延之詩去國還故里 詩悠悠南行 鶴注西川交河

郡在唐隴右道郡亦有交河縣自縣二百七十里至北
庭都護府城備吐蕃之處也 司馬遷傳赴公家之難

陳琳詩官作自有程 洙曰程限期會也 史記張耳
傳張耳常亡命遊外黃漢書竇榮亡命山林顏師古注

命名也謂脫其名籍而逃亡也 盧注開元中折衝未
停兵有定籍不似召募無稽可以逃脫故曰亡命嬰禍

羅嵇康詩坎壈趣世務常恐嬰禍羅 陸機五等諸侯
論境土踰溢 漢書嚴助傳是時武帝好征伐四夷開

置邊郡王融策秀才文選將開邊 說苑長制三年所
以報父母之恩 鮑照詩吞聲躑躅不敢言 陸機從

軍行朝食不免
宵夕息常負戈

盧元昌曰此拈開邊為諸章眼目自開元十五年王
君奭啟釁後張忠亮破吐蕃於渴谷拔其大莫門城

杜賓客破吐蕃於祁連城下十七年張守素破西南
蠻拔昆明及鹽城王禕破吐蕃於石堡城十八年烏
承玘破奚契丹於捺祿山二十年以後雖吐蕃又款
至赤嶺之碑仆蒙端又開與奚契丹交構不已此皆
開邊之禍也

出門日已遠不受徒旅欺骨肉恩豈斷男兒死無時走

馬脫轡頭手中挑青絲捷下

去聲

萬仞

一作丈

岡俯身試蹇

旗

二章敘在道時輕生自奮之語

軍伍習熟不受欺於徒侶矣

生死無時不暇計

及骨肉矣脫轡而挑起青絲下岡而學試蹇旗言時時
蹈危地也杜臆前言棄絕父母恩此云骨肉恩豈斷

乃徘徊輟轉之意左思詩出門無通路古詩相去
日已遠顏延之詩改服飭徒旅記骨肉之親無絕

也陳琳詩男兒寧當格鬪死死無時時時可死也

曹植詩走馬長楸間樂府木蘭詩南市買轡頭梁

簡文帝詩宛轉青絲鞵注青絲馬鞵也左思詩振衣

千仞岡何承天詩溪谷萬仞曹植詩俯身散馬蹄

李陵書斬將奪旗

瓚云拔取曰奪

磨刀鳴咽

於吉切

水水赤刃傷手欲輕腸斷聲心緒亂已

大丈夫誓許國憤惋復

扶又切

何有功名圖麒麟戰骨當

速朽

三章中道傷心而為自解之詞水聲觸耳不覺

寬也杜臆前四化用隴頭歌極鑪錘之妙韓詩外

傳晏子左手持頭右手磨刀蔡琰胡笳曲夜聞隴水

兮聲鳴咽辛氏三秦記隴山頂有泉清水四注東望秦

川如四五里俗歌隴頭流水鳴聲幽咽遥望秦川肝腸

欲絕 博物志江河水赤名曰泣血 老子夫代大匠
斲者鮮有不傷手矣 鮑照詩行子心腸斷 孫萬壽詩
心緒亂如絲 戴嵩詩丈夫意氣本自然 孔稚圭詩
本持許國志 况復武功彰 吳越春秋越王夫人歌情
憤悅兮誰識 後漢鄧禹傳垂功名於竹帛 漢書蘇
武傳甘露三年上思股肱之異圖畫大將軍霍光等一
十八人於麒麟閣張宴曰武帝
獲麒麟時作 記死欲速朽

送徒既有長

子兩切

遠戍亦有身生死向前去不勞吏怒瞋

七真切

路逢相識人附書與六親哀哉兩決絕不復

扶又切

同 一作

問 苦辛

四章在途驅迫而歎也 下四痛六親之不見

遠戍亦有身此被徒長

呵斥而作自憐語 杜臆初出門則父母難割在途久則

徧想六親此人情也 哀哉兩語即書中之意孤身遠戍

欲同苦辛而不可得語更慘戚史記高祖以亭長為縣送徒驪山陰鏗詩遠戍唯聞鼓寒山但見松吏

即送徒之長鮑照詩呵辱吏見侵顏氏家訓房文

烈未嘗怒瞋古詩道逢鄉里人賈誼策以奉六親

注六親父母兄弟妻子前漢禮樂志六親和睦注父子

兄弟姑姊甥舅婚媾姻婭陶潛詩哀哉亦可傷莊

子流遁之志決絕之行卓文君白頭吟聞君有兩意

故來相決絕曹植詩倉卒骨肉情能不懷苦辛

迢迢萬里餘領我赴三軍軍中異苦樂音洛主將去聲寧盡

聞隔河見胡騎去聲倏忽數百羣我始為奴僕幾時樹功

勲五章初到軍中而歎也上四傷主將之寡恩下四慨立功之無日曰幾時樹勲則麒麟之願難必矣

謝靈運詩迢迢萬里帆古詩相去萬餘里左傳作三

軍王粲詩從軍有苦樂六韜後漢注主將龍韜

庾信詩嘶馬隔河聞史記李敢直貫胡騎吳均詩胡騎欲成羣左思詩倏忽數百敵公孫弘傳贊衛青奮於奴僕胡夏客曰封常清始為高仙芝僕後代仙芝為節度使同開邊拓境此亦起於奴僕者謝靈運詩我行詎幾時揚子法言人道交功勲成楊炯詩丈夫皆有志會見立功勲後出塞云重高勲即樹功勲意也
有引通鑑百姓有勲者免征役不合

挽弓當挽強用箭當用長射

音石下同

人先射馬擒賊

英華作寇

先擒王殺人亦有限立

一作列

國自有疆苟能制侵陵豈

在多殺傷

六章為當時黷武而數也在擒王一句上三句皆引興語下四句申明

張綖注章意只

不必濫殺之故

上中疊用成語擒王則衆自降即所謂殲厥渠魁脅從罔治者

杜臆他人有前四句必無

後四句兼此八句方是仁者無敵之師三代而下誰復
領此論兵邁古風此老蓋自道也 周國策長兵在前
強弩在後蘇秦傳天下強弓勁弩皆從韓出 周勃傳
材官引彊孟注如今挽彊司馬 左傳樂伯左射馬而
右射人 書不愆於六伐七伐乃止齊馬所謂殺人有
限也馬援立銅柱為界所謂列國有彊也 史記炎帝
欲侵陵諸侯 又
李陵殺傷萬餘人

黃生曰前四語似謠似諺最是樂府妙境 又曰戰
陣多殺傷始自秦人蓋以首級論功前代無是也至
出塞之舉則始于漢武帝當時衛霍雖屢勝然士卒
大半物故矣明皇不恤其民而遠慕秦皇漢武此詩
託諷
良淡

驅馬天雨

去聲

雪軍行入高山逕危抱寒石指落曾

同層

冰

間已去漢月遠何時築城還浮雲暮南征可望不可攀

七章為戍邊築城而歎也上四述嚴寒之苦下四敘

思歸之情

唐注哥舒翰嘗築城青海疑於冬月行師

故為軍士苦寒之吟詩驅馬悠悠又雨雪霏霏

又高山仰止梁簡文帝賦既浪激而沙游亦苔生而

逕危前漢蒯通傳會大寒士卒墮指者什二三王

逸楚詞注北方常寒其冰重累張正見昭君詞霜樓

明漢月史記蒙恬傳秦已并天下使蒙恬將三十萬

衆築長城天寶中哥舒翰屢築軍城備吐蕃樂府古

八變歌浮雲多暮色楚辭泊吾

南征分孫擢詩可望不可尋

單

呈廷切

于寇我壘百里風塵昏雄劍四五動彼軍為

去聲

我奔虜其名王歸繫

音計

頸授棘門潛身備行

音杭

列一勝

何足論

平聲 制勝下

八章見其有敵愾之勇 上四言臨敵

劍動寇奔

此軍士之獲勝乃其意必欲盡空幕南之庭而後快一勝又何足論乎此寫猛氣雄心躍躍欲動 盧注潛身

備行列如獨坐樹下之馮異一勝何足論如八戰八克之吳漢 杜臆單于借用漢事 自外侵內曰寇 說

文壘軍壁也 庾信詩風塵千里昏 烈士傳楚王夫

人常納涼而抱鐵柱心有所感遂懷孕後產一鐵楚王

命鑄鄒鑄此為雙劍三年乃成劍一雌一雄趙絕書楚

王作鐵劍三枚晉鄭聞而求之不得興師圍楚三年不

解楚引太阿之劍登城而麾之三軍破敗士卒迷惑流

血千里 張綖注開元中河西將宋青春每戰運劍大

呼執馘而旋未嘗中鋒鏑後獲吐蕃主帥問之曰常見

青龍突陣而來兵刃所及如及銅鐵以為神助也始知

劍之異公雄劍二句兼用此事 魏文帝詩一發連四

五漢書衛青霍去病虜名王貴人以百數注名王謂有

大名以別於諸小王也史高帝紀秦王子嬰繫頸以紐周禮設車宮轅門史記項羽召見諸侯將入轅門張晏曰軍行以車為陣轅必相向為門說苑楚莊王伐陳吳救之左史倚相曰吳兵夜至何不行列鼓出待之呂氏春秋武王一勝而王天下

從軍十年餘能無分寸功衆人貴苟得欲語羞雷同中

原有鬪爭况在狄與戎丈夫四方志安可辭固一作窮

九章為冒功邀賞者發上云貴苟得見邊將營私之弊下云志四方見軍士報國之忠十載從戎何啻一勝乃有功不伐窮且益堅此軍伍而有統臣之節矣盧注冒功苟得凡濫殺無辜掩敗為捷及攘奪人功皆是當時如高仙芝崔嘉逸之徒往往蹈此若爭功而鬪則中原且不自安况能遠征戎狄乎見志在天下者

不為一身計也昔廉頗欲辱蘭相如相如避之曰吾所
以為此者先國家之急而後私讐也意正相同舊說
中原而有鬪爭則與外夷無異況能責及戎狄乎曹
植詩從軍度函谷又君行踰十年蘇秦傳無有分
寸之功荀子名不貴荀得淮南子計功而受賞不為
苟得記毋雷同注雷之發聲物無不同時應者左
傳戰於中原呂氏春秋喜起鬪爭反為用矣記西
方曰戎北方曰狄左傳姜氏謂公子曰子有四方之
志張協詩君子守
固窮在約不爽貞

張綆曰李杜二公齊名李集中多古樂府之作而杜
公絕無樂府惟此前後出塞數首耳然又別出一格
用古體寫今事大家機軸不主故常昔人稱詩史者
以此黃生曰六朝好擬古類無其事而假設其詞
杜詩詞不虛發必因事而設此即修辭立誠之旨非
詩人所及周珙曰前後出塞諸作奴隸黃初諸子

而出如將百萬軍寶之惜之而又能風雨使之真射
潮之力沒羽之技王嗣夷曰出塞九首是公借以
自抒所蘊讀其詩而思親之孝敵愾之勇恤士之仁
制勝之畧不尚武不矜功不諱窮豪傑聖賢兼而有
之詩人
乎哉

送高三十五書記十五韻

按舊書高適字達夫渤海人解褐授汴州封丘

尉非其好也乃去位客遊河右河西節度使哥舒翰見而異之表為左曉衛兵曹充翰府掌書記從
翰入朝盛稱之於上前據此則適為書記在翰未
入朝之前其入朝稱適亦必在十一載時蓋適同
至京而公作詩以送之也若十四載翰以風疾還
京闔門不與朝請宣暇薦士君前乎通鑑謂十三
載五月翰奏前封丘尉高適為掌書記此特遙奏
授官恐適未必至京何緣送贈詩章耶明與舊書

杜詩
不合

崆峒小麥熟且

一作吾

願休王師請公問主將

去聲

馬

於度切

用窮荒為

首戒邊將窮兵致公已先見其兆矣

天寶之亂由當時黠武所致公已先見其兆矣高為書記軍事皆得衆

謀故以休兵息民告之

贈哥舒翰詩先從朝廷發端

寄高書記詩先從主將發端起局正大黃希曰衆字

記禹迹之內山名崆峒者三一在臨洮一在安定一在汝州黃帝問道之所專指汝州此當是指臨洮蓋河西

節度治梁州而洮涼在唐並隸隴右

古詩高田種小麥桓帝初童謠小麥青青大麥枯通鑑積石軍每歲

麥熟吐蕃輒獲之邊人呼為吐蕃麥莊天寶六載哥舒翰先伏兵於其側寇至斷其後夾擊之無一人得返者

自是不敢復來此詩正指其事唐志崆峒山在岷州積石軍在廓州廓去岷不遠詩王師之所江賦竭南

極窮東荒詩言不
必窮兵於荒外也
餓鷹未飽肉側翅隨人飛高生跨鞍

馬有似幽并平聲兒一作并脫身簿尉中始與捶楚辭此原

其遠行之故窮而依人有似餓鷹且素負鞍馬之才

豈肯羈身一尉鮑欽止曰捶楚謂鞭朴有罪者朱

注魏志陳登喻呂布曰登見曹公言待將軍譬如養虎

當飽其肉否則噬人公曰不如卿言譬如養鷹餓則為

用飽則颺去又晉載記慕容垂猶鷹也餓則附人飽則

高飛吳質答東阿王書情踴躍於鞍馬梁簡文帝

詩少解孫吳法家本幽并兒師氏曰幽并二州其俗習

騎射也史記張耳傳耳是時脫身遊司馬遷報任

少卿書被筮楚受辱後漢陳寵傳宜滌蕩煩苛之法輕

薄筮楚以濟羣生說文捶以杖擊也筮與捶同皆木名

借問今何官觸熱向武威答云一作一書記所媿國士

知人實不易

去聲

知夏

一作尤

須慎其儀

此誌其初為書記

設為問答本於

古詩

不易知見事人之難慎其儀見行已之難此朋

友規箴之義也程曉詩今世襍穢子觸熱到人家

舊唐書涼州屬河西道武德二年置總管府天寶元年

改武威郡督涼甘肅三州乾元元年復為涼州洙曰前

漢武威郡故匈奴休屠王地武帝太初四年開魏志

太祖以陳琳阮瑀為司空軍謀祭酒掌書記室國策

豫讓曰智伯以國士遇我庚信詩疇昔國士遇生平知

已恩范雅傳侯羸曰人固未易知知人亦不易詩

敬慎威儀黃庭堅注陶侃傳諸叅佐當正其

衣冠攝其威儀何可亂頭養望自謂曠達耶十年出幕

府自可持旌麾一作旗此行既特達足以慰所思一云亦

思男兒功名遂亦在老大唐佐時此冀其將來建樹

高遇哥舒已在暮年

故有功名老大之語 蔡邕薦邊文韶表幕府初開博選
清英師古曰幕府者以軍幕為義軍旅無常居止故以帳

幕言之廉頗李牧市租皆入幕府非因衛青始有其號

曹植離思賦欲畢力於旌麾師氏曰唐制從軍歲以

者得為大郡故云十年持旄麾 蕭琛詩之子兩特達

古詩寒裳望所思 陸機詩男兒多遠志 荀子功

名慕大 古詩

老大徒傷悲

常恨結驪淺各在天一涯

叶音宜

又如參

與商慘慘中腸悲驚風吹

一作飄

鴻鵠不得相追隨黃塵

翳沙漠念子何當

一作時

歸

古韻支微通用

邊城有餘力早寄從

軍詩

末結送別之意

方聚而散故恨結驪之淺別難復聚又有參商之感驚風二句已不得往黃塵二

句高不能來故囑其寄詩以相慰從軍詩仍應記室此章四句起十句結中三段各六句 左傳願結驪於

二三君任昉詩結驪三十載生死一交情 古詩相去
萬餘里各在天一涯 左傳子產以辰為商星參為晉
星蘇武詩昔為駕與騫今為參與辰此本左氏也鄭司
農說星土引春秋傳曰參為晉星商為大火始改左氏
本文而參商並稱蔡琰胡笳同天隔越分如商參此又
本於鄭氏也 詩或慘慘畏咎 陸倕詩沉思結中腸
曹植詩驚風飄白日 張良傳鴻鵠高飛一舉千里
曹植詩飛蓋相追隨 又賦揚黃塵之冥冥 前漢
書隔以山谷壅以沙漠 蘇武詩念子不得歸 商君
傳盡遷之於邊城 諸葛穎詩玄覽屬睿詞風雲有餘
力 王仲宣
有從軍詩

按按楚有兩說一云尉楚罪人一云尉自受楚邵氏
聞見錄引杜牧之詩云參軍與簿尉塵土驚助勦一
語不中治鞭笞身滿瘡此指尉被捶楚也張綽引韓
昌黎詩云棲棲法曹掾何處事卑陬何况親犴獄敲

榜發奸偷則尉固以捶楚為職矣友人萬斯同曰與人贈別而舉其戮辱賤事恐不近情考高適為封丘尉時作詩云祇言小邑無所為公門百事皆有期拜迎官長心欲碎鞭撻黎庶令人悲故杜公送達夫云脫身簿尉中始與捶楚辭即用高詩意也還作捶楚他人為是

奉留贈集賢院崔

國輔

于休烈

二學士

鶴注此當是天寶十

一載作公獻三賦明皇奇之召試文章崔于二學士當是試文之官公詩云集賢學士如堵牆觀我落筆中書堂唐詩紀事崔國輔吳郡人初授許昌令累遷集賢直學士禮部員外郎唐書于休烈開元初第進士自秘書省正字累遷集賢殿學士轉比部員外郎唐六典開元十三年召學士張說等宴於集仙殿改名集賢殿修書所為集賢殿書院五品以上為學士六品以下為直學士

昭代將垂白途窮乃叫閤氣衝星象表詞感帝王尊

首敘

獻賦之事

上二說得悲憫下二說得豪邁

洙曰昭

代猶言明時指本朝也搜神記將辭昭代

前漢杜業

傳注垂白老言白髮下垂也鮑照詩垂白對講書阮

籍哭窮途

甘泉賦選巫咸兮叫帝閤

宋之問詩氣

衡落日紅

王融策文上叶星象下符川嶽

洙曰公

嘗有詩云往年文彩動人主即所謂詞感帝王尊也

天老書題目春官驗討論

平聲

倚風遺鵑

音逸鵑同

路隨水到

龍門竟與蛟螭雜空聞

一作寧無

燕雀喧青冥

一作雲非

猶契濶

一作連

凌

舊作陵

厲不

一作小非

飛翻

次言召試不遇集賢應試下四送隸有

上四

司天老謂宰相春官謂禮部

龍門意在騰躍蛟螭雜龍門難上矣燕雀喧鷗路却回

矣契濶不飛無復飛騰之志也帝王世紀黃帝以風
后配上台天老配中台五聖配下台謂之三公張衡詩
天老教軒皇晉書山濤傳甄拔人才各為題目南史
杜之偉傳與學士劉陟等抄撰羣書各為題目周禮
太宗伯為春官杜臆驗討論謂考驗其文詞所自出
故赴試者語必典雅唐詩可為後世羽儀者以此孔安
國書序討論墳典隋煬帝賜劉炫詩名理窮研覈英華
恣討論左傳六鷁退飛過宋都也昭明太子啟鷁路
頽風三秦記龍門在河東界每暮春有黃黑鯉魚自
海及諸州爭來赴之得上者便化為龍否則曝腮黥額
而退南都賦憚虬龍今怖蛟螭史記陳涉曰燕雀
安知鴻鵠之志哉何胥詩空餘燕雀喧青冥注見首
卷詩死生契濶注以為勞苦之意今云青冥契濶乃
濶絕之義陳琳書陵厲清浮顧盼千里抱朴子徒間
振翅竦身不能凌厲九霄王粲詩苟非鴻鵬孰能飛
翻朱注公以詞賦為人主所知再降恩澤止送隸有

司叅列選序故有青冥契濶之嘆
儒術誠難起家聲庶已存故山多藥

物勝槩憶桃源欲整還鄉旆長懷禁掖垣謬稱三賦在

難述二公恩

原注甫獻三大禮賦出身二公嘗謬稱述末欲東還而敎留贈之意上四失意

思歸下四感別知己此章四句起下二段各八句公孫弘傳弘習文法吏事而又緣飾以儒術抱朴子

起家作臺郎難起謂不能奮起在位家聲謂詩名猶足紹祖也任昉傳四子竝無術業墮其家聲公系

出襄陽曾祖依藝始如洛之鞏縣遂居於此杜陵乃其宗族所在夢弼泥鹿門採藥武陵桃源遂以故鄉為襄

陽但移羣已經四世襄陽無復田廬可依矣當從朱注作洛陽故居其曰憶桃源欲如秦人之避世耳不必親

至桃源也應瑒詩日暮歸故山抱朴子仙人以藥物養身陶淵明桃花源記晉太元中武陵人捕魚為

業緣溪行忘路之遠近忽逢桃花林夾岸林盡水源便
得一山捨舟從山口入豁然開朗屋舍儼然阡陌交通
鷄犬相聞黃髮垂髫並怡然自樂見漁人乃大驚自云
先世避秦時亂率妻子邑人來此絕境不復出焉方興
勝覽桃源在鼎州縣南二十里旁有秦人洞唐朗州即
宋鼎州今為常德府桃源縣鸚鵡賦春西顧而長懷
劉楨詩誰謂相去遠隔此西掖垣師氏曰禁中有東
西兩掖垣乃禁牆也江總詩下筆成三賦范弘之
賤仰尊
二公

貧交行

鶴注此必公獻賦後久寓京華故人莫有
念之者故有此作梁氏編在天寶十一載

是也

翻手作雲覆

音福

手雨紛紛輕薄何須數

所主切

君不見管

鮑貧時交此道今人棄如土

公見交道之薄而傷今思古也杜臆作行止此四

句語短而恨長亦唐人所絕少者鮑照詩暫交金石心須曰越殺王降漢如反覆手耳

史雲雨隔史記漢王曰天下紛紛張華詩末世多輕薄史記管夷吾者頽上人也常與鮑叔牙游叔知

其賢仲貧困嘗欺鮑叔叔終善遇之已而鮑叔事齊公子小白遂進管仲仲既任政於齊桓公以霸仲曰生我

者父母知我者鮑叔也後漢書宋弘曰貧賤之交不可忘范雲詩思舊昔言有此道今已微莊子視喪

其足猶遺土也

送韋書記赴安西

鶴注安西都護府治所在龜茲國城內節度使撫寧西域考天

寶十一載封常清為安西副大都護攝御史中丞持節充安西四鎮節度經畧度支營田副大使知

節度事韋必為其書記也公以天寶十載獻三賦
召試文章待制集賢詩云公車留二年當是十一
年作 唐書元帥節度府有
掌書記一人關預軍中機密

夫子歟

許勿切

通貴雲泥相望懸白頭無藉

申氏疑作籍

在朱

紱有哀憐書記赴三捷

一作接

公車留二年欲浮江海去

此別意茫然

雲泥包下四句白頭無藉而朱紱見憐此叙目前韋赴書記而已留公車此叙別後

皆一雲一泥相去懸絕處末二結出惜別意杜臆書記未是顯官而作雲泥之歎其窮可知如投贈哥舒翰語極贊頌望一書記尚不可得也晉丁彬書雲泥異途邈矣懸隔千金翼論老人之性必恃其老無有藉在趙曰無藉在謂無所倚藉故用對哀憐申涵光曰舊解作通籍及無聊意俱杜撰蓋言無著籍所在如今籍

貫之籍身老無家幸為朱紱所哀憐耳唐制御史賜金印朱紱韋書記必兼官御史故云班固戡將軍哀憐賜固手迹書記見前詩豈敢定居一月三捷
東方朔傳注公車令屬衛尉上書者所詣曹罔六代
論浮舟江海謝靈運詩此別
久無適鮑照詩茫然荒野中

玄都壇歌寄元逸人

鶴注道書有玄都所謂禹封五符秘以金英之函檢以玄

都之印是也詩蓋作於天寶十一載蔡夢弼曰玄都壇漢武帝所築在長安南山子午谷中十洲

記玄都在北海去岸三十六萬里有太玄都仙伯真公所治師氏注元逸人隱道士也盧注李

白與元丹丘遊疑即此人

故人昔隱東蒙峰已佩含景

音影

蒼精龍故人今居子午

谷獨並

一步浪切一作在

陰崖白

一作結

茅屋

首叙逸人之居蓋自山東而遷居秦

元

嶺者開首叙明朱注公同太白訪范隱居詩余亦東
蒙客憐君如弟兄此在魯郡作也昔遊詩東蒙赴舊隱
尚憶同志樂正指元逸人言陸放翁謂東蒙乃終南山
峯名引种明逸詩登遍終南山東蒙最孤秀為証乃喜
新之說未足信也潘鴻曰抱朴子道術諸經可以却
惡防身者有數千法如含景藏形等不可勝計又云諸
大符出於老君其中有青龍符等術用之可以得仙此
詩已佩舍景蒼精龍即所謂青龍符耳初學記後漢
公孫瑞劍銘從革庚新含景吐商史記索隱又耀鉤云
東宮蒼帝其精為龍神仙傳壺公云吾嘗佩含景駕蒼
精注東方蒼龍春秋繁露劍之在左蒼龍象也漢書
子午道從杜陵直絕南山逕漢中注子北方也午南方
也言通南北道相當泰記長安正南山名秦嶺谷名子
午西征賦眺華嶽之陰崖顏師古漢書注白屋茅

也屋
屋前太古玄都壇青石漠漠松從文粹一作常風寒子規夜

啼山竹裂王母晝下

去聲

雲旗翻

一作景

青石松

中記玄都壇

幽僻

地幽僻

矣子規夜啼幾於裂竹聲悲慘也王母晝下有似翻旗
尾動搖也列子太古至於今年數固不可勝紀朱

注十洲記玄洲在北海去岸三十六萬里有太古都
仙伯真公所治唐六典煬帝改佛寺為道場道觀為玄

壇神仙傳王烈之太行山中見山破石裂數百丈兩
畔皆是青石述異記利州葭萌縣玉女房是大石穴前

有數竹莖下有青石壇每因風自掃梁簡文帝詩淇
水漠漠青苔浮劉繪詩松風循路急張華詩巢居

知風寒禽經鵲舊周子規也江介曰子規蜀右曰杜
宇注甌越間曰怨鳥夜啼達旦血漬草木凡啼必北向

山竹裂別有三說劉云燒竹爆裂以驚去子規謝注
云子規啼聲如竹裂偽蘇注引竇誼居蜀之津源子規

啼而庭竹裂出於妄撰黃希謂子規夜啼而山竹為之欲裂得之杜修可曰王母鳥名故對子規酉陽雜俎

云齊郡匡山有鳥足青嘴赤黃素翼絳顙名王母使者又王椿齡云其尾五色長二三丈許飛則翩翩正如旗

狀列仙傳穆王與王母會瑤池雲旗霓裳擁簇自天而下九歌乘回風兮載雲旗知君此計成

誠一作長往芝草琅玕日應長鐵鑲高垂不可攀

致身福地何蕭爽末稱其抱道高棲超於塵俗芝草琅玕仙家之食鐵鑲高垂仙人之居

福地蕭爽道遠自得也此章三段各四句史記留侯傳誰為此計者乎北山移文或歎幽人長往漢

武內傳王母曰太上之藥有黃庭芝草碧海琅玕邵注仙人能種玉故云日應長舊注道藏經晉時有戊

卒屯於子午谷入谷之西澗水窮處忽見鐵鎖下垂約有百餘丈戊卒欲挽引而上有虎蹲踞馬法苑珠林終

南山大秦嶺竹林寺貞觀初採蜜人山行聞鐘聲尋而往至馬寺旁大竹林可二頃其人斷二竹節以盛蜜尋路至大秦戍具告防人戍主利其大竹遣人覓取過小竹谷達於崖下有鐵鎖長三丈許防人曳鎖掣之大牢將上有二虎踞崖頭向下大呼其人怖急返洞天福地記終南山太乙峰在長安西南五十里左右四十里內皆福地阮籍首陽山賦初蕭爽而揚音

虞元昌曰是時道教盛行山人王元翼紛紛撰妙寶真符元逸人修真子午谷中不求人知自高人一等矣申涵光曰子規夜啼山竹裂王母畫下雲旗翻二語大類長吉見此老無所不有也

曲江三章章五句

此詩三章舊注皆云至德二載公陷賊中時作按詩旨乃自嘆

失意初無憂亂之詞當是天寶十一載獻賦不遇後有感而作李肇國史補進士既捷大燕於曲

江亭子謂之曲江會曲江大會在闕試後亦謂之
開宴據此則知公之對景興慨意固有所為矣
鶴注寰宇記曲江池漢武帝所造名為宜春苑其
水曲折有似廣陵之江故名朱注曲江在杜陵西
北五里康駢劇談錄云曲江池本秦隄州開元中
疏鑿為勝境其南有紫雲樓芙蓉苑其西有杏園
慈恩寺花卉環列烟水明媚都
人遊賞盛於中和上巳二節

曲江蕭條秋氣高菱荷枯折隨風濤遊子空嗟垂二毛

白石素沙亦相蕩哀鴻獨叫求其曹

首章自傷不遇其情悲在第三句

點意上二屬興下二屬比菱荷枯折引起二毛沙石
相蕩自比飄流哀鴻求曹念及同氣也宋玉風賦蕭
條衆芳月令以達秋氣楚辭天高而氣清洛陽伽
藍記葭茨被岸菱荷覆水謝靈運詩江濶壯風濤

蘇武詩請為遊子吟左傳不禽二毛注頭白有二色

詩白石鑿鑿江淹詩素沙匝廣岸禍衡賦哀鴻

感類劉安招隱士禽獸駭兮亡其曹

即事非今亦非古長歌激越捐

所交切

林莽

莫補切

比

毘至切

屋豪華固難數

所主切

吾人甘作心似灰弟姪何傷淚如

雨

次章放歌自遣其語曠歌聲激林足以一抒胸臆在第二句作截江上豪華久已灰心置之弟姪何必

為我傷心乎蓋勸之達觀也杜臆即事吟詩體雜古今其五句成章有似古體七言成句又似今體曰長歌

者連章疊歌也列子周之尹氏有老役夫晝則呻吟即事陶潛詩即事多所欣謝靈運詩即事怨睽攜蘇

武詩長歌正激烈西都賦震聲激越宋玉風賦麗石伐木捐殺林莽捐動搖也木曰林草曰莽尚書大傳

周民可比屋而封庾信詩金穴盛豪華前漢息夫躬傳僕遊不足數西征賦陋吾人之拘攣莊子心

固可使如死灰乎王績詩袁宗多弟姪古樂府孤兒淚下如雨

自斷丁亂切此生休問天杜曲幸有桑麻田故將移住南

山邊短衣匹馬隨李廣看射蒙炎切猛虎終殘年

三章志在歸隱

其辭激窮達休問於天首句陡然截住因杜曲故及南山因南山故及李廣射虎一時感慨之情豪縱之氣

殆有不能自掩者矣陶潛詩聊復得此生杜修可曰楚辭天問篇序天問者屈子之所作也何不言問天

天尊不可問杜曲在長安俗云南城韋杜去天尺五雍錄樊川韋曲東十里有南杜北杜杜固謂之南杜

杜曲謂之北杜二曲名勝之地東方朔諫起上林苑疏其地有桑麻竹箭之饒西都賦桑麻鋪棻寧戚飯

牛歌短布單衣適至軒 越絕書匹馬啼嗥夫心雕龍
車兩馬尺以並耦為用蓋車貳佐乘馬儼駮服服乘不
隻故名號必雙名號一定則雖單為尺矣匹夫匹婦亦
取配義也 漢李廣傳廣屏居藍田南山中射獵見草
中石以為虎而射之 詩中故將二字乃承上之詞或因李
有虎常自射之 廣傳有故將軍語遂指當時
武將謝官者恐不合詩意

王嗣爽曰先言鴻求曹以起次章弟姪之傷次言心
似灰以起末章南山之隱三章氣脉相屬總以九迴
之苦心發清商之怨調此公學三百篇遺貌而傳神
者也觀命題可見而自謂非今非古意可知矣嘗謂
公此詩學三百七歌學離騷新安吏諸作學古樂府
俱自開堂奧不肯優孟古人 盧世澐曰曲江三章
塌翼驚呼忽邀天際
國風之後又續國風

奉贈鮮于京兆二十韻

鶴注通鑑天寶十二載正月京兆尹鮮于仲通諷選

人請為國忠刻頌立於省門制仲通撰其詞則仲通為京兆尹在十一年十一月國忠為相後也詩云獻納紆皇眷中間謁紫宸當是公獻賦待詔集賢院後十一年十二月作也唐書李叔明傳叔明本姓鮮于氏兄仲通字向天寶末為京兆尹楊國忠傳國忠素德仲通使討雲南舉軍沒以白衣領職未幾國忠引為京兆尹鄭曰鮮于複姓

王國稱多士賢良復

扶切

幾人異才應

平聲間

去聲出

一作世

爽氣必殊倫始見張京兆宜居漢近臣驂駟開道路鵬

鶚離

去聲

風塵

前三段稱鮮于後三段公自敘首從多士

形起稱其才氣傑出

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

驂駟喻異才鵬鶚

喻爽氣上下四向自相呼應詩思皇多士生此王國

漢文帝詔將何以來遠方之賢良孔融表近日路

粹嚴亦用異才公孫弘贊異人間出世說桓宣武素

有雄情爽氣左思詩與世亦殊倫漢書膠東相張

敞治京兆畧循趙廣漢之迹元帝即位待詔鄭明薦敞

先帝名臣宜傳輔皇太子國語近臣盡規穆天子

傳左服驂騑而右騄耳郭璞注驂騑色如華而赤吳

志孫權書自道路開通高唐賦鴈鵠飛揚伏竄

邵注鴈鵠皆鷙鳥之大者而鵠又侯伯知何算一作

大於鴈王文憲集序脫落風塵等文

章實致身奮飛超等級容易去聲失沉淪脫畧礪溪釣操

持郢匠斤雲霄今已逼台衮更誰親次從侯伯形起稱其位望特優當

今侯伯雖多鮮于獨以文章進身一旦奮飛而起則向
之沉淪頓失矣礪溪言遇合之遲郢匠言鋒銑之利二

句承失沉淪雲霄言得近天子台衮言得交宰相二句
承超等級亦上下四句自為開闢顏魯公墓碑仲通
年近四十舉鄉貢進士五十始擢一第從官十年而後
超登四岳可見其晚年始遇陸機五等諸侯論侯伯
無可亂之符何足算見論語典論文章經國之大
業晉王尊帖足下所欲致身處尚在彀中吳均詩
相須無羽翮何由總奮飛記貴賤之等級東方朔
傳談何容易抱朴子運屯則沉淪於勿用恨賦脫
畧公卿水經注渭水之右磻溪水注之溪中有泉謂
茲泉東南隅石室太公所居水次平石即太公垂釣之
所莊子何其無操持與又郢人墮其鼻端若蟬
翼使匠石斲之匠石運斤成風盡聖而鼻不傷張昶
華山堂闕銘必雲霄之路可升而起王褒尉遲公
碑任隆台衮趙注上公應天上三台三公一命衮鳳
穴雛皆好龍門客又新義聲紛感激敗績自逡巡

中四
結上

以起下 墓碑謂其有子六人皆有令聞又謂輕財尚義果於然諾此即鳳雛龍門之說也敗績逡巡自歎蹇

於遭際 山海經丹穴之山有鳥焉其狀如雞五采而文名曰鳳凰北史文苑傳飾羽儀於鳳穴晉書陸雲幼

時吳尚書閔鴻見而奇之曰此兒若非龍駒定是鳳雛李膺傳膺性簡亢被容接者名為登龍門 傳玄詩

義聲馳雍涼 趙岐孟子章句千載聞之猶有感激左傳以敵大崩曰敗績 過秦論逡巡而不敢進 途

遠 一作永 欲何向天高難重陳學詩猶孺子 一云子夏 鄉賦忝

一作念 嘉賓不得同晁錯吁嗟後邲 音陳 訛計疎疑翰墨時

過憶松筠 此追敘應舉下第事在開元二十三年 遠 遠天高進身無階也猶孺子公年尚少忝嘉

賓時登鄉薦引晁邲二公言知遇弗如古人計疎不善干謁時過欲收晚節也 主父偃傳日暮途遠 曹植

云天高聽遠

劉琨詩棄置勿重陳論語學詩乎

史記孺子可教矣

鄉賦謂鄉舉

詩我有嘉賓小序

鹿鳴宴羣臣嘉賓也

晁錯傳文帝詔有司舉賢良文

學錯在選中時對策者百餘人惟錯為高第由是選中

大夫

詩

吁嗟麟兮

晉書

泰始

中舉賢良

直言之士

却詵以對策上第拜議郎

史記范雎傳其於計疎矣

然後學

任昉求

立館

啟竟

松筠

於歲

晚

學

時

過

獻納

紆皇

然

後學

任昉求

立館

啟竟

松筠

於歲

晚

學

時

過

獻納

眷中間謁紫宸且隨諸彥集方覲薄才伸破膽遭前政

陰謀獨秉鈞微生需忌刻萬事益酸辛

此敘獻賦召試事在天寶十載

紆皇眷曲荷主知謁紫宸應試殿中破膽以下恨李

林甫之忌才只陰謀忌刻四字極盡姦邪情狀按李

林甫傳天寶六載帝詔天下通一藝以上者皆詣京師

林甫恐對策者斥言其奸乃委尚書省覆試遂無一人

及第公初應詔而見黜後以召試而仍棄皆林甫為之
今林甫已去故云前政兩都賦序言語侍從之臣朝

夕論思日月獻納沈約齊安陸昭王碑皇情眷眷
阮瑤書中間尚淺也唐六典紫宸殿即內朝正殿

江淹別賦金閨諸彥嚴助傳越人綿力薄才谷永
傳臣所以破膽寒心孔叢子文容曰不害前政而有

成牛弘詩微生逢大造庚信賦既言多於思刻謝
靈運詩萬事俱零落

阮籍詩悽愴懷酸辛
交合丹青地恩傾雨露辰有儒

愁餓死早晚報平津未望汲引乃贈詩本意仲通與
國忠交合則施恩正易為力故託

以窮愁之狀報於平津此章前後四段各八句中脛
結尾各四句鹽鐵論公卿者神化之丹青賀凱詩

恩榮雨露濡朱買臣傳終餓死於溝中耳韓非子
無早晚之失漢公孫弘傳元朔中代薛澤為丞相封

平津侯開閣延士平津北國
忠舊指京兆朱注力辯其誤

少陵之投詩京兆隣於餓死昌黎之上書宰相迫於
饑寒當時不得已而姑為權宜之計後世宜諒其苦
心不可以宋儒出
處決責唐人也

白絲行

此詩當是天寶十一二載間客居京師而
作故末有忍羈旅之說當依梁氏編次師

氏謂此詩乃譏實懷貞鶴云懷貞亡於
開元元年公時纔兩歲於年月不合

繰絲須長不須白越羅蜀錦金粟尺象

一作牙

牀玉手亂

殷

烏間切

紅萬草千花動凝碧已悲素質隨時染

一作改

裂

下

去聲

鳴機色相射

食亦切

美人細意熨貼平裁縫減盡針

此見縹絲而託興正意在篇末上段有踵事增華之意欲成羅錦用尺量絲故須長所織花草色

兼紅碧故不須白
膩貼裁縫製為舞衣也
象牀指機
牀玉手指織女亂殷紅
謂經緯錯綜動凝碧
謂光彩閃

鮑照詩綠絲復鳴機唐書越州土貢花文寶花等羅

頭尺以金粟飾之富貴家之物
國策孟嘗君至楚獻

象牀直千金
江淹賦惜玉手之空佇
廣韻殷赤黑
色左傳左輪朱殷
王子安青苔賦云縈修樹而凝碧

王彪之詩絲染墨悲歎路歧楊感悼庾信連珠白羽
素絲隨其所染謝朓詩望望下鳴機朱注色相射

五色射人也。班彪傳：細意委曲。南史：何敬容衣裳不整，伏床煖之。楊慎曰：王莽傳有威斗，即尉斗也。威與

尉音相近本音畏轉音鬱隋書李穆奉尉斗於楊堅曰
願公執威柄以尉安天下史照通鑑釋文尉斗火斗持

火以申繒也俗加火作熨說文尉與熾本一字從上按
下也又持火申繒也今俗言平曰尉帖杜詩美人細意
熨帖平是也又白樂天詩金斗熨波
刀剪文 曹植樂府裁縫紉與素 春天衣 著 陟畧切

為君舞蛺蝶飛來黃鸝語落絮遊絲亦有情隨風照

去聲

日宜

英華同
一作疑

輕舉香汗清

一作輕

塵汗

去聲

顏色

英華作似
微汚一作

汚不著

開新合故置何許君不見才

英華作志

士汲引難恐懼

棄捐忍羈旅

下段有厭故喜新之感
歌聲落絮游絲乘風日而綴衣前此人情

蝶趁舞容鵬應

趨附者多一經塵汗汗顏棄置何所見繁華忽然零落
矣士故有鑒於此不輕受汲引而甘忍羈旅誠恐一旦
棄捐等於敝衣耳翫末二語公之不屑隨時俯仰可知
此章兩段各八句 徐君倩詩衣著一時新 鮑照

詩催絃急管為君舞 何遜詩黃鸝隱葉飛 蝶紫空
戲 庾信詩落絮鵝毛下 徐陵詩柳絮飛還聚 遊絲斷
復結 庾肩吾詩桃紅柳絮白 照日復隨風 照日宜輕
舉 謂絲絮飄颻與衣之輕舉相宜 楚辭願輕舉以遠
遊 六朝詩朱顏潤紅粉 香汗沾玉色 古詩空牀委
清塵 邢劭詩桃李無顏色 衣裳在筍故有開合漢
艷歌乍開乍合 世說桓冲妻曰衣不經新何由而故
阮籍詩君子在何許 嵇康琴賦歷世才士並為之
賦 劉向傳禹稷與皋陶傳相汲引不為比周 汲引
難難就薦引也 即記難進易退之難 魏甄后塘上行
莫以豪賢故棄捐 素所愛 左傳羈
旅之臣 漢書張晏注羈寄也 旅客也
鰲按詩詠白絲即墨子悲素絲意也 已悲素質隨時
染當其渲染之初便是汙污之漸及其見置時欲保
素質得乎唯士守貞白則不隨人
榮辱矣此風人有取於素絲歟

陪鄭廣文遊何將軍山林十首

鶴注鄭虔膺博士之命在天寶九載

以詩中第五首考之是公未定官時遊此當在十一二載間東方朔傳實太主曰回輿枉路臨宴

山林注園中有山故言山林通志少陵原乃樊川北原自司馬邲起至何將軍山林而盡其高三百

尺在杜城之東韋曲之西俗呼為塢陂

不識南塘

一作唐

路今知第五橋名園依綠水野竹上

上聲

青霄谷口舊相得濠梁同見招平生為

去聲

幽興

去聲

未惜

馬蹄遙

首章領起乃未至而遙望之詞林下四陪鄭同遊自塘至橋橋畔有園園中

上四何氏山

有竹層次如畫谷口指鄭濠梁指何趙汭曰何於鄭為舊交因而并招及已但以素有山林幽意故作此遊

非輕赴人招也說得曲折微婉杜臆末拈幽興為十首之綱世說祖述曰昨夜復南塘一遊此借其字朱

注許渾詩云背嶺枕南塘意在韋曲左右通志韋曲之西有華嚴寺寺西北有雁驚坡坡西北有第五橋

張禮遊城南記第五橋在韋曲西以姓得名世說王子敬自會稽經吳顧辟疆有名園先不識主人徑往其

家魏文帝詩菱芡覆綠水庾肩吾詩野竹交臨浦梁王訓詩石橋通小澗竹路上青霄谷口用鄭子

真事注見首卷莊子莊子與惠子同遊濠梁之上吳論園以水勝故稱濠梁陶潛詩山澤久見招陳子

昂詩山深興轉幽盤中詩何惜馬蹄歸不數

趙汭曰凡一題而賦數首者須首尾布置有起有結每章各有主意無繁複不倫之失乃是家數觀此十

章及後五章可見王嗣夷曰山林與園亭異依山臨水連邨落包原隰澗樵漁王右丞輞川似之非止

一丘一壑之勝而已合觀十首分明一篇遊記有首
有尾中間或賦景或寫情經緯錯綜曲折變化用正
出奇不可方物吳門顧氏曰首章言馬蹄四章言
沒馬八章言走馬蓋此遊有馬無舟故柁樓疑越刺
船思郢乃虛擬舟楫之趣非實事也黃生曰首章
敘入何鄭他人不免費手此能引古為喻語不繁而
意已明何
等簡淨

百頃風潭上千章

草堂本
作重

夏木清卑枝低結子接葉暗

巢鶯鮮鰓銀絲鱸香芹碧澗羹翻疑柁

徒可切

樓底晚飯

越中行

二章誌林中景物之勝
木五六承風潭末乃觸景而念昔遊

首二為綱三四承夏
風潭覆

以夏木見其蕭森可愛
謂疊韻詩

食有片鰓乃初到而留飲末云晚飯蓋至

朱注卑枝接葉二句古人所

暮而留宿矣庾信詩交柯乍百頃擢木或千尋黃
希曰潭當是廣濟潭在萬年縣祖孫登詩風潭如拂鏡

山溜似調琴史記貨殖傳山居千章之荻注大樹曰
章陶潛詩夏木獨森疎方氏疑卑低二字犯重然

古人亦所不避太白詩云玉窗青青下落花下落兩字
不免犯重但下就窗前言落就花片言亦自有別列

子鴻鵠高飛不集卑枝孫擢詩晚花猶結子周景
式孝子傳三荆同株接葉連陰銀絲鮮鱸之色碧澗

芹草所生洛陽伽藍記王肅至魏飯鯽魚羹酉陽
雜俎南孝廉善斫膾絲縷輕可飛呂氏春秋菜之美

者雲夢之芹說文楚葵水芹也今水中芹菜一名水英
謝靈運詩銅陵映碧澗庾信詩翻疑承毒水南

方大船尾有柁樓仲長統詩微風
為柁公年二十時曾遊吳越

萬里戎王子何年別月支異花來舊作開犯重杜臆作
來蓋音近而訛耳

絕域滋蔓匪清池漢使

去聲徒許作

空到神農竟不知露

翻兼雨打開拆漸

別作漸一作日

離披

三章記林間花卉之奇首記花名次記花種

五六承異花見其可貴七八承滋蔓憐其易謝張騫
不攜此種故曰空到本草弗載其名故曰不知杜臆

開拆頂露翻離披頂雨打本草日華子云獨活一名
戎王使者戎王子當是其類朱子語類未知何種鶴

曰加一戎字言其來自戎中猶云戎菽戎葵杜臆人競
珍之故猶稱戎王子胡夏客曰外國王子入居內地攜

有其土異花何將軍得其種也此說戎王子是借人稱
花漢書注月支西域外國也舊唐書肅州酒泉郡漢

月氏國地氏音支水經注水側生異花李陵書出
征絕域左傳無使滋蔓王儉詩蘭生已匝苑子

虛賦游於清池史記漢使至
宋玉九辯奄離披此梧楸

初疑第五句空字上不應用徒字後見許彥周詩話作漢使慚空到但慚字又下得太實楊升菴云古人用字有不嫌重者左傳十年尚猶有餘臭猶即尚也書經弗遑暇食遑即暇也據此則徒空不妨連用矣若實字便不當疊用太白懷張子房詩我來圯橋上却是言橋橋可乎

旁舍連高竹疎籬帶晚花碾渦湫沒馬藤蔓曲藏

一作垂

蛇詞賦工無

一作何

益山林跡未賒盡捻

捻正異作拈奴兼切

書籍

賣來問爾東家

四章羨林傍幽僻之致上四寫景下四敘情上四以整鍊為工下四以蕭疎

見致俱有章法沒馬是實事藏蛇是想像杜臆公獻賦不售故欲賣書買宅乃憤激之詞此云晚花七

章言清晨白日見其次第漢書高祖適從旁舍來梁簡文帝詩晚花欄下照疎螢簾上飛莊子輪碾地

欽定四庫全書

卷二

西京賦當足見碾值輶被輶此言碾輶底陷處水激成
渦偶舉所見以入詩如壞道哀湍瀉亦然杜臆謂園水
周圍曲繞狀如碾槽之渦蕭琛詩奕奕工辭賦古
詩虛名復何益未賒言不遠魏志蔡邕見王粲曰
此王公孫也有異才吾家書籍文章當盡與之
取物也邴原傳原遊學詣孫崧崧曰君鄉里鄭君學
者之範模也君乃舍之所謂以鄭君為東家丘也原曰
以鄭君為東家丘以僕為西家愚夫耶王筠詩微步出
東家東家
指何氏

剝

郭作滕趙云
滕俗作剝

水滄江破殘山碣石開綠垂風折笋紅

綻雨肥梅銀甲彈笋用

邵本作卸

金魚

一作盤非

換酒來興

去聲移

無灑

去聲去聲

隨意坐莓苔

五章見山林景物而喜逢豪

飲在四句分截

言此間穿

池壘石特大地中剝水殘山耳其勢之雄潤足以破滄
江而開碣石烹笋摘梅園中佳品彈箏換酒將軍豪興
故復移席苔前以享其用意之殷勤申涵光曰起語
近纖五六太板唐書有殘膏賸馥之句隋煬帝詩
日落滄江靜庾信謝滕王啟蒲桃繞館始開碣石之
池本是風折笋而綠垂雨肥梅而紅綻乃用倒裝句
法耳沈佺期詩園槿綻紅艷古詩十五學彈箏銀
甲不曾卸以銀甲作指甲取其有聲晉書阮孚為散
騎常侍常以金貂換酒唐車服志佩魚始高宗朝武
后改佩魚為龜中宗初罷龜袋復給魚楊慎曰高宗初
用佩魚以鯉為李也武后改用龜屬玄武也杜詩金
魚換酒來此時仍用魚矣李白贈賀知章云金龜換酒
處蓋係往時舊物耳盧照隣詩金貂有時須換酒後
漢陳蕃傳薛勤謂蕃曰孺子何不灑掃以待賓客
信賦細草橫階隨意坐
天台山賦踐莓苔之滑石

王嗣夷曰通首散漫寫去無起束呼應另是一格亦緣十首自有大起結此首如中聯也又曰銀甲二句見其好客而貧何本武人而風致不減賀季真尤為難得後人雷丐杜詩皆成佳句杜有春色醉仙桃句陳簡齋云暖日薰楊柳濃陰醉海棠杜有紅綻雨肥梅句范石湖云梅肥朝雨細茶老暮煙寒各見脫化之妙

風磴

丁鄧切

吹陰

一作梅非

雪雲門乳瀑

蒲木切

泉酒醒思卧簟

衣冷欲

一作得

裝綿野老來看

平聲

客河魚不取錢祗

一作只

疑淳樸處自有一山川

六章狀山林高寒而美其淳樸亦四句分截

風磴而吹陰雪

者乃雲門之吼瀑泉也

以下句解上句蓋夏本無雪飛瀑遙濺乍疑是雪耳酒醒方思卧簟而衣冷反欲裝

綿言夏日陰森也野老看客饋以河魚即此見風土淳樸與他處不同洪注另有一山川暗用桃花源事

鮑照詩既類風門磴孔融詩高明躍雲門山海經廬山有瀑布泉應劭藝文志注年老居田野相民耕

種故稱野老丘遲詩野老時一望淮南子河魚不得明目晉樂曲酤酒不取錢亢倉子政省則人淳樸

陶潛詩山川一何曠

棟音色一作棘樹寒雲色茵陳春藕香脆添生菜美陰益一作

蓋食單一作筭非涼野鶴清晨出一作至山精白日藏石林蟠

水府百里獨蒼蒼七章記山林物產而數其景幽亦四句分截茵陳之脆得生菜而加美

棟樹之陰展食單而倍涼次聯分頂野鶴晨出言其超曠山精晝藏言其深邃百里之內獨見蒼蒼甚言石林

之高聳非謂何林有百里也此云晨日下二章言晚
言夜次第又相聯絡棟棘乃小棗棘下鋪單頗無佳致
當是棟樹詩正義白色為棟赤棘為棘郭璞曰赤棟葉
細而岐銳白棟葉員而岐大木也陶潛詩寒雲沒西
山本草茵陳蒿類經冬不死更因舊苗而生故名
趙氏以單為鋪地之單乃布單也邵氏以單為盛器之
簞乃竹筐也謂方曰筍圓曰簞朱氏從前說鄭望善夫
錄韋僕射巨源有燒尾宴食單世說昂昂如野鶴之
在雞羣秦嘉詩清晨當引邁玄中記山精如人一
足長三四尺食山蟹夜出晝藏庾信詩山精鏤寶刀
石林叢石如林也楚辭馬有石林述異記漢沔會流
處岸上有石銘云下至水府三十一里皆傳李斯刻此
石江淹詩山氣亘百里

梁蕭統詩漸見岫蒼蒼

王嗣夷曰公恣意冥搜觸目成趣粗亦成
精近不遺遠隨意命筆變幻生動如此

憶過

平聲

楊柳渚走馬定

丁令切

昆池醉把青荷葉狂遺白

接羅刺

郎達切

船思郢客解

下戒切

水乞

欺吉切王原叔本作丘既切非

吳

兒坐對秦山晚

江湖興

去聲

頗隨

八章迹

因水府而旁記遊上四實景下四虛

募

山林勝遊留連累日故柳渚昆池亦皆經過折荷脫巾醉時狂態刺船解水走馬而思泛舟也

曹植詩

走馬長楸道

唐書安樂公主傳嘗請昆明池為私沼

不得乃自鑿定昆池張禮游城南記池在韋曲之北

定昆池既在韋曲之北楊柳渚亦當在其傍 酉陽雜俎魏鄭公懋取大荷葉置硯格上盛酒三升以簪刺葉

令與柄通傳吸之名碧筒杯按池有荷葉醉中把此為戲顧氏以為飲器之名非是漢招商歌青荷畫偃葉夜

舒晉山簡傳時人歌曰時時能騎馬倒著白接羅白接羅白巾也爾雅注白鷺翅上有長翰江東取為接羅

王洙曰郢客善操舟吳兒善泅水莊子刺船而去山
濤詩刺船蓮花浦郢客思遨遊郢乃楚之都解水識
水性也謝朓詩吳兒本習水歌笑輕波瀾

梁高爽詩坐對空寂宇秦山即終南山

諸家以上六句為追敘舊遊非也此遊本在夏時而
把荷解水亦正言夏日事豈指平時遊歷耶諸章言
鮮鯽香芹言綠筍紅梅言生菜食單言醉把荷葉知
園中留飲非一日矣此章所憶經過興會蓋同屬遊
也園事

牀上書連屋階前樹拂雲將軍不好去武稚子總能文

醒酒微風入聽詩靜夜分絺衣掛蘿薜涼月白紛紛

平聲

去聲

九章宿何園而記其韻事上四見主人儒雅下四言
夜景清幽首句屬賦起不好武次句屬此起總能文

顧注五六乃倒裝本言風入而酒醒夜分猶聽詩也
誦詩者必何氏子弟趙汭注微風涼月不作對耦轉
換開闔意態無窮此所謂大家數也南史蕭恭傳仰
眠床上看屋梁而著書世說謝太傅問諸子姪子弟
亦何預人事而正欲使其佳謝車騎曰譬如芝蘭玉樹
欲使其生於階庭耳顏氏家訓漢郎顏驕自稱好武
更無事迹歸去來詞稚子侯門前漢賈誼傳諸生
於是以為能文風賦清清冷冷愈病析醒嵇康詩微
風動袿靜夜分夜中分出更漏也魏文帝詩靜夜不
能寐周禮以星分夜韓非子夜分而聞鼓新聲者
蒨女蘿見楚辭岑文本詩雕樓網蘿薜王融詩壁門
涼月舉言月穿蘿薜影著絺衣者紛紛零落也張
正見詩紛紛
白雪綺窗前

劉會孟謂將軍好文亦見世變杜臆謂此治終亂始
之機皆非也明皇好大喜功致將帥開邊啟釁黷武

而殃民公詩健兒寧關死壯士恥為儒蓋傷之也何
將軍不好武正與邀功生事者有別少陵豈肯譏之
耶宋明之世以將不知兵而亡天寶之時以將好用兵
而亂事勢不同未可槩論劉之謬於說詩往往如此

幽意忽不愜歸期無奈何出門流水住

一作注

回首白雲

一作雜花非

多自笑燈前舞誰憐醉後歌祇應

平聲

與朋好風

雨亦來過

平聲

惜別之情三章總結乃出門以後情事

首二

八豫訂重遊

幽意不愜為迫於歸期耳兩句起勢突

兀舞曰自笑歌曰誰憐無復林中豪興矣故須再過

以慰寂寥朋好指鄭廣文

江淹詩寂寞幽意長世

說左太冲作三都賦初意思甚不愜

宋之問詩歸期

多年歲莊子為之奈何

易出門同人庾信詩畫

水流全住圖雲色半輕

劉顯詩回首望歸途左思

詩白雲停陰周 劉邠曰古人多歌舞飲酒張燕公詩
云醉後歡更好全勝未醉時動容皆是舞出話總成詩
李白云要須回舞袖拂盡五松山醉後涼風起吹人舞
袖環今時舞者必欲曲盡奇妙又恥效樂工藝益不復
如古人常舞矣古人重歌詩自隋以前南北舊曲頗似
古如公莫舞丁督護亦自簡淡唐來是等曲又不復入
聽矣近世樂府為繁聲加重疊謂之纏聲促數尤甚固
不容一唱三歎也 沈約詩心從朋好盡 杜臆風雨
用谷風

詩語

盧元昌曰公自留贈崔于後還鄉之旆故山興濃貧
交之歎白絲之悲既有慨乎言之何將軍於襄馬困
頃時獨有滾梁見招之舉得非城東種瓜之客溺
陵射虎之人歟宜公於遊覽之下記敘特詳也

麗人行

鶴注天寶十二載楊國忠與虢國夫人鄭
居第往來無期或並轡入朝不施障幕道

路為之掩目冬夫人從車駕幸華清宮會於國忠
第於是作麗人行此當是十二年春作蓋國忠於
十一年十一月
為右丞相也

三月三日天氣新長安水邊多麗人態濃意遠淑且真

肌理細膩骨肉勻繡

一作畫

羅衣裳照

英華作朝

莫

同暮

春感金

孔雀銀麒麟頭上何所有翠微

英華作為

匳

音遷鳥合切英華作匳音洽

葉垂鬢唇背

一作身

後何所見珠壓腰極

其輒切一作攢英華作枝

穩

稱身

此詩刺諸楊遊宴曲江之事首敘遊女之佳麗

聲也三言丰神之麗四言體貌之麗五六言服

色之麗頭背四句舉上下前後而通身之華麗俱見本寫秦虢冶容乃槩言麗人以槩括之此詩家含蓄得

體處 周禮女巫掌歲時祓除瘴浴注如今三月三日
上已往水上之類晉書禮樂志魏以後但用三日不復
用已劉尊詩三月三日咄泉水趙曰晉宋諸人侍宴曲
水皆以三月三日為題唐開元中都人遊賞於曲江莫
盛於中和上巳節 王右軍蘭亭曲水序天朗氣清惠
風和暢 曹植洛神賦觀一麗人於巖之畔王績三月
三日賦聚三都之麗人 劉緩詩日日態還新 庾信
答趙王啟飄飄意遠 王粲神女賦何產氣之淑真
濃如紅桃裹露遠如翠竹籠烟淑如瑞日祥雲真如澄
川朗月一句中寫出絕世丰神 東京賦擘肌分理楚
辭招魂靡顏膩理又豐肉微骨 周甸注肌膚腠理細
嫩而膩滑骨肉勻肥瘠相宜也神女賦穠不短纖不長
即骨肉勻也 古詩被服羅衣裳 南都賦暮春之氣
元已之辰 盧肇柘枝舞賦靴瑞錦以雲匝袍感生而
雁歌趙曰杜牧自謂其詩感金結綉知感金乃唐人常
語 周注孔雀奇禽麒麟瑞獸衣上所繡物色胡夏客

曰唐宣宗嘗語大臣曰玄宗時內府錦襖二飾以金雀
一自御一與貴妃今則卿等家家有之矣此詩所云蓋
楊氏服擬於宮禁也 辛延年詩頭上藍田玉 趙曰
翠微句葉言翡翠微布於句綵之葉若作翠為句葉則
以翠為句匹之葉也杜曰廣韻句綵婦人髻飾花也
鬢唇鬢邊也 晉書阮孚傳以著背後 趙曰腰褷即
今之裙帶綴珠其上壓而下垂也吳注爾雅褷謂之裾
郭璞云衣後裾也 穗稱身不徒以其服美矣劉綬詩
褷小稱腰身 趙曰此四句即曹植頭上金雀釵腰佩
紫琅玕之勢 楊慎謂松江陸澹見古本尚有二句足
下何所著紅蕖羅襪穿鏤銀今按
兩段各十句為界限添此反贊

名大國號與秦紫駝之峰 一作珍 出翠釜永精之盤行素

鱗犀筋厭飫以未下 去聲 驚刀縷切空 一作生 紛綸黃門飛

鞞不動塵御厨絡繹

英華作絲絡

送八珍簫管

一作鼓

哀吟感

鬼神賓從

去聲雜

一作合

逌

音沓

實要津

次誌

秦號之

華侈也

駝峯二句言味窮

水陸犀筋二句言飲食暴珍黃門二句言寵賜優渥簫
管言聲樂之盛賓從言趨附者多杜臆態濃八句極
狀姿容服飾之盛而後接以就中雲幕二句紫駝四句
極言肴饌品物之美而後接以黃門飛鞞二句皆倒插
法唯杜善用之庾信詩就中言不醉西京雜記成
帝設雲幄雲帳雲幕於甘泉紫殿世謂三雲殿周注雲
幕謂鋪設幕帳如雲霧也三輔黃圖椒房殿在未央
宮以椒和泥塗壁班固西都賦後宮則掖庭椒房后妃
之室漢官儀曰皇后稱椒房取其蕃實之義也詩云椒
聊之實蕃衍盈升又以椒塗宮室亦取其溫暖辟除惡
氣舊唐書太真姊三人皆有才貌並封國夫人大姨
封韓國三姨封虢國八姨封秦國通鑑適崔氏者為韓

國適裴氏者為號國適柳氏者為秦國鶴注明皇雜錄
上幸華清宮貴妃姊妹競飾衣服共會於國忠第同入
禁中炳煥照燭觀者如堵及上已修禊亦必爾也
日漢書大月氏本西域國出一封索駝注云脊上有一
封高也如封土然今俗呼為鞞西陽雜俎衣冠家名食
有將軍曲良翰作駝峯炙味甚美王績遊北山賦拭
丹爐而調石髓裹翠釜而出金精周注三輔黃圖董
偃以水精為盤貯冰同色太平御覽交州雜事太康四
年刺史陶璜表送林邑王所獻縹紺水精盤各一枚
王廙笙賦舞靈蛟之素鱗西陽雜俎明皇賜祿山有
金平脫犀頭匙筋楚辭時厭飫而不用兮晉書何
曾日食萬錢猶曰無下筋處詩執其鸞刀傳云鸞刀
刀環有鈴割中節也西征賦饗人縷切鸞刀若飛嵇
康詩隨波紛綸客漢百官表注禁中黃門謂閹人居
禁中在黃門之內給事者鮑照詩飛鞚越平陸通俗文
制馬口曰鞚王莽傳絡繹道路周禮膳夫珍用八物

注珍用淳熬淳母炮豚炮牂珍漬熬肝膋也漢武帝秋風詞蕭鼓鳴兮發棹歌曹植七啟蕭管齊鳴又詩過庭長哀吟詩序動天地感鬼神莫近於詩魏文帝與吳質書與輪徐動賓從無聲劉向傳雜還衆賢古詩先後來鞍馬何逡巡當軒一作下馬入一作據要路津

立錦茵楊花雪落覆數救白蘋青鳥飛去銜紅巾炙手

可熱勢

一作世

絕倫慎莫近

英華一作向

前丞相

去聲

瞋末乃指言國忠形容

其烜赫聲勢也秦說前行國忠殿後鞍馬逡巡見擁護填街按轡徐行之象當軒下馬見意氣洋洋旁若無人

人之狀楊花青鳥點暮春景物見唯花鳥相親遊人不敢仰視也一時氣鼓可畏如此末句仍用倒插作收

朱注國忠與說國為從兄妹不避雄狐之刺故有近前丞相瞋之語蓋微詞也此章前二段各十句後段六

句收 曹植詩遊馬後來 鮑照詩賓御紛珮香鞍馬
光照地 莊子逡巡而却告之 王融詩當軒卷羅縠

丘遲詩舒心謝錦茵 七命素膚雪落 廣雅楊花入
古詩為焦仲卿妻下馬入車中 錦茵謂地鋪錦褥

水化為萍爾雅翼萍之大者曰蘋五月有花白色謂之
白蘋張華詩白蘋開素葉隋煬帝江南曲絮飛晴雪暖

風時此即楊花落雪之意 趙曰青鳥應如鸚鵡之類
恭養馴熟飛銜紅巾此借用西王母青鳥也薛道衡詩

願作王母三青鳥飛來飛去傳消息漢武故事七月七
日上於承華殿齋坐中忽有青鳥從西方來集殿前有

項王母至有二青鳥如烏夾侍王母旁 梁元帝咏柳
枝邊通粉色葉裏映紅巾趙注紅巾蓋婦人之飾黃注

巾蓋樹間所掛之絲 崔灝詩莫言炙手手可熱兩京
新記安樂公主上之季妹也附會韋氏熱可炙手道路

懼馬趙曰炙手可熱言勢焰薰灼 桓麟詩超等絕倫
晉樂府詞當年近前面發紅 通鑑天寶十一載十

一月以楊國忠為右相兼文部尚書玉臺新詠引漢桓帝時童謡曰撫梁之下有懸鼓我欲擊之丞相怒瞋怒之瞋從目音稱人切陳餘傳瞋目張膽嗔字從口音田盛氣貌詩振旅嗔嗔二字音義本異杜却通用周敬曰鋪敘得體氣脉條暢的從古樂府摹出另成少陵樂府盧元昌曰中云賜名大國號與秦後云慎莫近前丞相嗔玩此二語則當時上下驕淫瀆倫亂禮已顯然言下矣陸時雍曰詩言窮則盡意褻則醜韻軟則庠杜少陵麗人行李太白楊叛兒一以雅道行之故君子言有則也又曰色古而厚黥染處不免墨氣太重

虢國夫人

詩云承恩入朝乃虢國得寵時作依類編入當附麗人行之後但未定何年耳

朱注此詩見草堂逸詩據張祐集作集靈臺二首又萬首唐人絕句作張祐三體詩唐詩品彙亦

作張枯集靈臺與紫微殿相近今按枯乃中唐
人去天寶已久若作追憶號國之詞亦當微帶亂
後事詩意全不及之還是譏諷現在應屬少陵作
也唐后妃傳楊貴妃三姊長韓國三號國八秦
國並承恩入宮掖通鑑至德二載貴妃縊死於佛
堂號國夫人及其子裴徽走至陳倉縣令薛景仙
帥吏士追捕誅之

號國夫人承主恩平明上

上聲

馬入金門却嫌脂粉澆

烏

切

顏色澹掃蛾眉朝

音潮

至尊

乍讀此詩語似稱揚及細

玩詩旨却諷刺微婉曰號

國濫封號也曰承恩寵女謁也曰平明上馬不避人目

也曰淡掃蛾眉妖姿取媚也曰入門朝尊出入無度也

當時濁亂宮闈如此已兆陳倉之禍矣一旦紅顏委地

白骨誰憐徒足貽臭千古馬耳王褒講德論主恩滿

溢史記張良傳平明與我會此搜神記上馬赴前
程前漢書厯金門上玉堂後漢陳蕃傳脂油粉黛

廣韻泥泥著物也楚國策顏色變作楊妃外傳
妃有姊三人皆豐碩修整工於詭浪每入宮中移晷方
出號國不施粧粉自銜美艷常素面朝天掃畫眉也
詩螭首蛾眉蛾之眉曲而細美人之眉似之過秦
論履至尊而制六合

九日曲江

當是天寶十二載作蓋十三年九日有
寄岑參詩十四年九日有楊奉先詩此

詩蓋在前也時公年四十
十有二故云百年已半

綴席茱萸好浮舟

戶敢切

菖

徒威切

衰

所追切

百年秋已半

一作季秋
時欲半

九日意兼悲江水清源曲荆門北路疑晚來

一作高興去聲盡搖蕩菊花期杜臆此章即老去悲秋之意

年非

高興

盡

搖蕩

菊花

期

杜臆

此章

即老

去悲

秋之

身老故有兼悲之歎下四拈曲江所傷在落魄故有搖蕩之嗟通首將一景一情兩截重敘虛實相間格杜集

頻用之

此詩

乍看

似乎

直致

須抑

揚說

來方

見曲

折

生動言

茱萸

雖好

而茱萸

已衰

不覺

悲秋

悲老

兼集

意

中也且

江上

此遊

彷彿

荆門

勝會

而搖

蕩花

期者

猶是

去秋故

吾浮

沉身

世又

可悲

已

荆楚

歲時

記茱

萸一

名穀九

月九

日熟

味辛

色赤

折其

房挿

頭可

辟惡

氣曹

植詩茱

萸自有

芳

爾雅

荷芙

渠其

華茱

萸茱

洙曰

蓮莖

為嘉葉

為荷

花為

菡萏

蓮根

為藕

劉楨

詩菡

萏溢

金塘

張正見

詩百

齡候

忽半

屈原

遠遊

軼迅

風於

清源

分

九域

志江

陵府

龍山

上有

孟嘉

落帽

臺其

地在

門東

宋之

問詩

邪溪

北路

通

李百

藥詩

晚來

風景

麗

殷仲

文詩

獨有

清秋

日能

使高

興盡

上林

賦與

波搖蕩

荆楚

歲時

記九

日為

菊花

會故

云菊


花期

續齊諧記費長房謂桓景曰九月九日汝家有厄急去
令家人各作絳囊盛茱萸以繫臂登高飲菊花酒則此
除禍可

武衛將軍補註

後人崇尚杜詩於鍊字鍊句鍊格莫不取法焉如杜
銛鋒行愜順猛噬失躑騰上二字用漢書作對王介
甫云一水護田將綠遠兩山排闥送青來借用漢書
字而語尤工巧杜洛城一別四千里胡騎長驅五六
年將地里年數作對柳子厚云一身去國六千里萬
死投荒十二年蘇子瞻云故山西望三千里往事回
思十二年亦本杜句但杜以兩語領全詩柳蘇只中
間敘述耳杜鄭駙馬宅宴詩上尾用薄麓谷乃同韻
字唐末章碣詩東南路盡吳江畔正是窮愁暮雨天
鷗鷺不嫌斜雪岸波濤欺得逆風船偶逢島寺停帆

看淡羨漁翁下釣眠今古若論英達算鷗夷高興固
無邊七律中隔句用韻並為奇格但杜出之無心而
章却摹倣有意也



杜詩詳註卷二